

四庫全書

子部

欽定四庫全書

子部

世說新語卷上之下

詳校官侍講學士臣平恕

侍讀臣孫球覆勘

總校官編修臣王燕緒

校對官學正臣蔡必昌

謄錄監生臣李如梓

欽定四庫全書

世說新語卷上之下

宋 劉義慶 撰

梁 劉孝標 注

政事第三

陳仲弓為太丘長時吏有詐稱母病求假事覺收之令
吏殺焉主簿請付獄考衆姦仲弓曰欺君不忠病母不
孝不忠不孝其罪莫大考求衆姦豈復過此

陳寔已別見

陳仲弓為太丘長有劫賊殺財主主者捕之未至發所

道聞民有在草不起子者回車往治之主簿曰賊大宜

先按討仲弓曰盜殺財主何如骨肉相殘

按後漢時賈彪有此事不

聞實也

陳元方年十一時

陳紀已見

候袁公袁公問曰賢家君在太

丘遠近稱之何所履行元方曰老父在太丘彊者綏之

以德弱者撫之以仁恣其所安久而益敬

袁宏漢紀曰寔為太丘其

政不嚴而治百姓敬之

袁公曰孤往者嘗為鄴令正行此事不知

卿家君法孤孤法卿父

檢袁漢書袁氏諸公未知誰為鄴令故闕其文以待通識者

元方曰周公孔子異世而出周旋動靜萬里如一周公
不師孔子孔子亦不師周公

賀太傅作吳郡初不出門吳中諸強族輕之乃題府門

云會稽雞不能啼

環濟吳紀曰賀邵字興伯會稽山陰人祖齊父景並歷美官邵歷散騎常

侍出為吳郡太守後遷太子太傅

賀聞故出行至門反顧索筆足之曰

不可啼殺吳兒於是至諸屯邸檢校諸顧陸役使官兵
及藏逋亡悉以事言上罪者甚衆陸抗時為江陵都督

吳錄曰抗字幼節吳郡人丞相遜子孫策外孫也為江陵都督累遷大司馬荊州牧故下請孫皓

然後得釋

山公以器重朝望年踰七十猶知管時任

虞預晉書曰山濤字巨源

河內懷人祖本郡孝廉父曜宛句令濤蚤孤而貧少有器量宿士猶不慢之年十七宗人謂宣帝曰濤當與景

文共綱紀天下者也帝戲曰卿小族那得此快人邪好莊老與嵇康善為河內從事與石鑒共傳宿濤夜起踰

鑒曰今何等時而眠也知太傅卧何意鑒曰宰相三日不朝與尺一令歸第君何慮焉濤曰咄石生無事馬蹄

門也投傳而去果有曹爽事遂隱身不交世務累遷貴吏部尚書僕射太子少傅司徒年七十九薨諡康侯

勝年少若和裴王之徒並共宗詠有署閣柱曰閣東有

大牛和嶠鞅裴楷鞅王濟別勗不得休

王隱晉書曰初濟領吏部潘岳

內非之密為作謠曰閭東有大牛王濟鞅裴楷鞅和嶠
刺促不得休竹林七賢論曰濤之處選非望路絕故貽
是或云潘尼作之文士傳曰尼字正叔滎陽人祖勗尚
書左丞父滿平原太守並以文學稱

尼少有清才文詞溫雅
初應州辟終太常卿

賈充初定律令

晉諸公贊曰充字公間襄陵人父逵魏
豫州刺史充起家為尚書遷廷尉聽訟

稱平晉受禪封魯郡公充有才識明達治體加善刑法
由此與散騎常侍裴楷共定科令蠲除密網以為晉律
薨贈太軍與羊祜共咨太傅鄭冲王隱晉書曰冲字文和滎
陽開封人有核練才清虛

寡欲喜論經史草衣縕袍不以為
憂累遷司徒太保晉受禪進太傅冲曰臯陶嚴明之旨

非僕闇懦所探羊曰上意欲令小加弘潤冲乃粗下意

續晉陽秋曰初文帝令荀勗賈充裴秀等分定禮儀律令皆先咨鄭冲然後行也

山司徒前後選殆周遍百官舉無失才凡所題目皆如

其言唯用陸亮是詔所用與公意異爭之不從亮亦尋

為賄敗

晉諸公贊曰亮字長興河內野王人太常陸乂兄也性高明而率至為賈充所親待山濤為左

僕射領選濤行業既與充異自以為世祖所敬選用之事與充咨論充每不得其所欲好事者說充宜授心腹人為吏部尚書恭同選舉若意不齊事不得諧何不召公與選而實得叙所懷充以為然乃啓亮公忠無私濤以亮將與己異又恐其協情不允累啓亮可為左丞相非選官才世祖不許濤乃辭疾還家亮在職果不能允

坐事
免官

嵇康被誅後山公舉康子紹為秘書丞

山公啓事曰詔選秘書丞濤薦

曰紹平簡溫敏有文思又晚音當成濟也猶宜先作秘書郎詔曰紹如此便可為丞不足復為郎也晉諸公贊

曰康遇事後二十年紹乃為濤所援王隱晉書曰時以紹父康被法選官不敢舉年二十八山濤啓用之世祖

發詔以為秘書丞

紹洛公出處

竹林七賢論曰紹懼不自容將解褐故咨之於濤

公曰

為君思之久矣天地四時猶有消息而況人乎

王隱晉書曰紹

字延祖雅有文才山濤啓武帝云云

王安期為東海郡

名士傳曰王承字安期太原晉陽人父湛汝南太守承冲淡寡欲無所循

尚累遷東海內史為政清靜吏民懷之避亂渡江是時道路寇盜人懷憂懼承每遇艱險處之怡然元皇為鎮

東引為從
事申郎

小吏盜池中魚網紀推之王曰文王之圃與

衆共之

孟子曰齊宣王問文王之圃方七十里有諸若
是其大乎對曰民猶以為小也王曰寡人之圃

方四十里民猶以為大何耶孟子曰文王之圃
殺麋鹿者如殺人罪是以四十里為小亦宜乎
今王之圃殺麋鹿於國中也民以為大不亦宜乎

池魚復何足惜

王安期作東海郡吏錄一犯夜人來王問何處來云從

師家受書還不覺日晚王曰鞭撻甯越以立威名恐非

致理之本

呂氏春秋曰甯越者中牟鄙人也苦耕稼之
勞謂其友曰何為可以免此苦也其友曰莫

如學也學三十歲則可以達矣甯越曰請以十五歲人
將休吾不敢休人將卧吾不敢卧學十五歲而為周威

公之使吏送令歸家

成帝在石頭

晉世譜曰帝諱衍字世根明帝太子年二十二崩

任讓在帝前戮

侍中鍾雅

晉陽秋曰讓樂安人諸任之後隨蘇峻作亂雅別傳曰雅字彥胄潁川長社人魏太傅鍾

繇弟仲常曾孫也少有才志累遷至侍中

右衛將軍劉超

晉陽秋曰超字世瑜琅邪人漢成陽

景王六世孫封臨沂慈鄉侯遂家焉父徽為琅邪國上將軍超為縣小吏稍遷記室掾安東舍人忠清慎密為

中宗所拔自以職在中書絕不與人交關書疏閉門不通賓客家無僭石之儲討王敦有功封零陽伯為義興

太守而受拜及往還朝莫有知者其慎默如此帝泣曰還我侍中讓不

奉詔遂斬超雅

雅別傳曰蘇峻逼主上幸石頭雅與劉超並侍帝側匡衛與石頭中人密期拔

至尊出事
覺被害

事平之後陶公與讓有舊欲宥之許柳

許氏譜曰

柳字季祖高陽人祖允魏中領軍父猛吏部郎劉諫之
晉紀曰柳妻祖逖子渙女蘇峻招祖約為逆約遣柳以

衆會峻既克京師拜
丹陽尹後以罪誅

兒思妣者至佳諸公欲全之

許氏譜曰

永字
思妣

若全思妣則不得不為陶全讓於是欲并宥之事

秦帝曰讓是殺我侍中者不可宥諸公以少主不可違

并斬二人

王丞相拜揚州賓客數百人並加霑接人人有說色唯

有臨海一客姓任

語林曰任名顯時官在都預王公坐

及數胡人為未洽

公因便還到過任邊云君出臨海便無復人任大喜說

因過胡人前彈指云蘭闍蘭闍羣胡同笑四坐並懽

晉陽

秋曰王導接誘應會少有忤者雖疎交常賓一見多輸寫款誠自謂為導所遇同之舊暱

陸太尉詣王丞相咨事過後輒翻異王公怪其如此後

以問陸

陸玩別傳曰玩字士瑤吳郡吳人祖瑁父英仕郡有譽玩器量淹雅累遷侍中尚書左僕射尚

書令贈太尉

陸曰公長民短臨時不知所言既後覺其不可

耳

丞相嘗夏月至石頭看庾公庾公正料事丞相云暑可

小簡之庾公曰公之遺事天下亦未以為允

殷美言行曰王公薨

後庾冰代相網密刑峻美時行遇收捕者於途慨然歎曰丙吉問牛喘似不爾嘗從容謂冰曰卿輩自是綱目不失皆是小道小善耳至如王公故能行無理事謝安石每歎詠此唱庾赤玉曾問美王公治何似詎是所長美曰其餘令績不復稱論然三捉三治三休三敗

丞相末年略不復省事正封錄諾之自歎曰人言我憤

憤後人當思此憤憤

徐廣歷紀曰導阿衡三世經綸吏險政務寬恕事從簡易故垂遺愛

之譽也

陶公性檢厲勤於事

晉陽秋曰侃練核庶事勤務稼穡雖戊陳武士皆勸厲之有奉饋者

皆問其所由若力役所致惟喜慰賜若他所得則呵辱
還之是以軍民勤於農稼家給人足性纖密好問頗類
趙廣漢嘗課營種柳都尉夏施盜拔武昌郡西門所種
侃後自出駐車施門問此是武昌西門柳何以盜之施
惶怖首伏二軍稱其明察侃勤而整自強不息又好督
勸於人常云民生在勤大禹聖人猶惜寸陰至於凡俗
當惜分陰豈可遊逸生無益於時死無聞於後是自棄
也又老莊浮華非先王之法言而不敢行君子當正其
衣冠攝以威儀何有亂頭養望自謂宏達邪中興書曰
侃嘗檢校佐吏若得擣蒲博奕之具投之曰擣蒲老子
入胡所作外國戲耳圖碁堯舜以教愚子博奕紂所造
諸君國器何以為此若王事之暇患邑邑者文士何不
讀書武士何不射
弓談者無以易也
作荊州時敕船官悉錄鋸木屑不限
多少咸不解此意後正會值積雪始晴聽事前除雪後

猶濕於是悉用木屑覆之都無所妨官用竹皆令錄厚頭積之如山後桓宣武伐蜀裝船悉以作釘又云嘗發所在竹篙有一官長連根取之仍當足乃超兩階用之

何驃騎作會稽

晉陽秋曰何充字次道廬江人思韻淹通有文義才情累遷會稽內史侍中驃

騎將軍揚州刺史贈司徒

虞存弟謩作郡主簿

孫統存謩叙曰存字道長會稽山陰人也

祖陽散騎常侍父偉州西曹存幼而卓拔風情高逸歷衛軍長史尚書吏部郎范汪恭品曰謩字道真仕至郡功

曹以何見客勞損欲白斷常客使家人節量擇可通者作白事成以見存存時為何上佐正與謩共食語云白

事甚好待我食畢作教食竟取筆題白事後云若得門

庭長如郭林宗者當如所白

秦別傳曰秦字林宗有人倫鑒識題品海內之士或

在幼童或在里肆後皆成英彥六十餘人汝何處得此

人謬於是止

王劉與林公共看何驃騎驃騎看文書不顧之

晉陽秋曰何充

與王濛劉惔好尚不同由此見識於當世

王謂何曰我今故與林公來相看

望卿擺撥常務應對玄言那得方低頭看此邪何曰我

不看此卿等何以得存諸人以為佳

桓公在荊州全欲以德被江漢恥以威刑肅物

溫別傳曰溫以

永和元年自徐州遷荊州刺史在州寬和百姓安之

令史受杖正從朱衣上過桓

式年少從外來

式桓歆小字也桓氏譜曰歆字叔道溫第三子仕至尚書

云向從閣

下過見令史受杖上捎雲根下拂地足意識不著桓公

云我猶患其重

簡文為相事動經年然後得過桓公甚患其遲常加勸

勉太宗曰一日萬幾那得速

尚書畢陶謨一日萬幾孔安國曰幾微也言當戒懼

萬事之微

山遐去東陽王長史就簡文索東陽云承藉猛政故可

以和靜致治

東陽記云遐字彥林河內人祖濤司徒父簡儀同三司遐歷武陵王友東陽太守江

博傳曰山遐為東陽風政嚴苛多任刑殺郡內苦之博隱東陽以仁恕懷物遐感其德為檄損威猛

殷浩始作揚州

浩別傳曰浩字淵源陳郡長平人祖識撰陽相父羨光祿勳浩少有重名仕至

揚州刺史中軍將軍中興書曰建元初庾亮兄弟何充等相尋薨太宗以撫軍輔政徵浩為揚州從民譽也

劉尹行日小欲晚便使左右取襪人問其故答曰刺史

嚴不敢夜行

謝公時兵廝逋亡多近竄南塘下諸舫中或欲求一時

摻索謝公不許云若不容置此輩何以為京都

續晉陽秋曰自

中原喪亂民離本域江左造創豪族并兼或客寓流離
名籍不立太元中外禦強氏蒐簡民實三吳頗加澄檢
正其里伍其中時有山湖遁逸往來都邑者後將軍安
方接客時人有於坐言宜糾舍藏之失者安每以厚德
化物去其煩細又以強寇入境不宜加動人情乃荅之
云卿所憂在於客耳然不爾何以為京都言者有慚色

王大為吏部郎

王忱已見

嘗作選草臨當奏王僧彌來聊出

示之

僧彌王珉小字也珉別傳曰珉字李琰琅邪人丞相導孫中領軍洽少子有才藝善行書名出兄珣

右累遷侍中中書令贈太常

僧彌得便以已意改易所選者近半王

大甚以為佳更寫即奏

王東亭與張冠軍善

張玄已見

王既作吳郡人問小令曰

續

陽秋曰王獻之為中書令王珉代之時人曰大小王令

東亭作郡風政何似答曰

不知治化何如唯與張祖希情好日隆耳

殷仲堪當之荊州王東亭問曰德以居全為稱仁以不

害物為名方今宰牧華夏處殺戮之職與本操將不乖

乎殷答曰臯陶造刑辟之制不為不賢

古史考曰庭堅號曰臯陶舜謀

臣也舜舉之於堯堯令作士主刑

孔丘居司寇之任未為不仁

家語曰孔子自

魯司空為大司寇七日而誅亂法大夫少正卯

文學第四

鄭玄在馬融門下

融自叙曰融字季長右扶風茂陵人少而好問學無常師大將軍鄧騭召

為舍人棄遊武都會羌虜起自關以西道斷融以謂古人有言左手據天下之圖而右手刎其喉愚夫不為何則生貴於天下也豈以曲俗咫尺為羞滅無限之身哉因往應之為校書郎出為南郡太守三年不

得相見高足弟子傳授而已嘗笑渾天不合諸弟子莫

能解或言玄能者融召令筭一轉便決眾咸駭服及玄

業成辭歸既而融有禮樂皆東之歎

高士傳曰玄字康成北海高密人八

世祖崇漢尚書玄別傳曰玄少好學書數十三誦五經好天文占候風角隱術年十七見大風起詣縣曰某時

當有大災至時果然智者異之年二十一博極羣書精
歷數圖緯之言兼精算術遂去吏師故兗州刺史第五
元先就東郡張恭祖受周禮禮記春秋傳周流博觀每
經歷山川及接顏一見皆終身不忘扶風馬季長以英
儒著名玄往從之叅考同異季長后戚嫚於待士玄不
得見住左右自起精廬既因紹介得通時涿郡盧子幹
為門人冠首季長有不解剖裂七事玄思得五子幹得
二季長謂子幹曰吾與汝皆弗如也季長臨別執玄手
曰大道東矣子勉之從過黨銅隱居著述凡百餘萬言
大將軍何進辟玄乃縫掖相見玄長八尺餘須眉美秀
姿容甚偉進持以賓禮授以几杖玄多所匡正不用而
退乘紹辟玄及去踐之城東欲玄必醉會者三百餘人
皆離席奉觴自旦及暮度玄飲三百餘杯而溫克之容
終日無怠獻帝在許都徵為大司農行至元城而卒

恐玄擅名而心忌焉玄亦疑有追乃坐橋下在水上據

履融果轉式逐之告左右曰玄在土下水上而據木此

必死矣遂罷追玄竟以得免

馬融海內大儒被服仁義鄭玄名列門人親傳其業

何猜忌而行鴆毒乎委巷之言賊夫人之子

鄭玄欲注春秋傳尚未成時行與服子慎遇宿客舍先

未相識服在外車上與人說已注傳意

漢南紀曰服虔字子慎河南滎

陽人少行清苦為諸生尤明春秋左氏傳為作訓解舉孝廉為尚書郎九江太守

玄聽之良久

多與已同玄就車與語曰吾久欲注尚未了聽君向言

多與吾同今當盡以所注與君遂為服氏注鄭玄家奴

婢皆讀書嘗使一婢不稱旨將撻之方自陳說玄怒使

人曳箸泥中須臾復有一婢來問曰胡為乎泥中

衛式微詩

也毛公曰泥中衛邑名也

答曰薄言往愬逢彼之怒

衛邶杕之詩

服虔既善春秋將為注欲參考同異聞崔烈集門生講

傳

擊虞文章志曰烈字威考高陽安平人駟之孫瑗之兄子也靈帝時官至司徒太尉封陽平亭侯

遂

匿姓名為烈門人賃作食每當至講時輒竊聽戶壁間

既知不能踰已稍共諸生敘其短長烈聞不測何人然

素聞虔名意疑之明蚤往及未寤便呼子慎子慎虔不

覺驚應遂相與友善

鍾會撰四本論始畢甚欲使嵇公一見置懷中既定畏

其難懷不敢出於戶外遙擲便回急走

魏志曰會論才性同異傳於世

四本者言才性同才性異才性合才性離也尚書傳般論同中書令李豐論異侍郎鍾會論合屯騎校尉王廣論離

文多不載

何晏為吏部尚書有位望時談客盈坐

文章敘錄曰晏能清言而當時

推勢天下談士多宗尚之魏氏春秋曰晏少有異才善談易老

王弼未弱冠往見之晏

聞弼名

弼別傳曰弼字輔嗣山陽高平人少而察惠十餘歲便好莊老通辯能言為傳般所知吏部尚

書何晏甚奇之題之曰後生可畏若斯人者可與言天
人之際矣以弼補臺郎弼事功雖非所長益不留意頗
以所長笑人故為時士所嫉又為人淺而不識物情初
與王黎荀融善黎奪其黃門郎於是恨黎與融亦不終
好正始中以公事免其秋遇痛疾亡時年二十四弼之
卒也晉景帝嗟歎之累日曰天喪予其為高識悼惜如
此因條向者勝理語弼曰此理僕以為極可得復難不
弼便作難一坐人便以為屈於是弼自為客主數番皆
一坐所不及

何平叔注老子始成詣王輔嗣見王注精奇廼神伏曰
若斯人可與論天人之際矣因以所注為道德二論

魏氏
春秋

曰弼論道約美不如晏自然出拔過之

王輔嗣弱冠詣裴徽

永嘉流人名曰徽字文季河東聞喜人太常潛少弟也仕至冀州刺

史徽問曰夫無者誠萬物之所資聖人莫肯致言而老

子申之無已何邪

弼別傳曰弼父為尚書郎裴徽為吏部郎徽見異之故問弼曰聖

人體無無又不可以訓故言必及有老莊未免於有恒

訓其所不足

傅嘏善言虛勝

魏志曰嘏字蘭碩北地泥陽人傳介子之後也累遷河南尹尚書嘏嘗論才性

同異鍾會集而論之傳子曰嘏既達治好正而有清理識要如論才性原本稍微鮮能及之司隸鍾會年甚少

假以明
知交會

荀粲談尚玄遠

粲別傳曰粲字奉倩潁州潁陰人太尉或少子也粲諸兄儒術

論議各知名粲能言玄遠常以子貢稱夫子之言性與天道不可得而聞也然則六籍雖存固聖人之糠粃能

言者不能屈

每至共語有爭而不相喻裴冀州釋二家之義

通彼我之懷常使兩情皆得彼此俱暢

粲別傳曰粲太和初到京邑與

傳假談善名理而粲尚玄遠宗致雖同倉卒時或格而不相得意裴微通彼我之懷為二家釋頃之粲與假善管輅傳曰裴使君有高才逸度善言玄妙也

何晏注老子未畢見王弼自說注老子旨何意多所短

不復得作聲但應諾諾遂不復注因作道德論

文章錄曰自

儒者論以老子非聖人絕禮棄學
晏說與聖人同著論行於世也

中朝時有懷道之流有詣王夷甫咨疑者值王昨已語
多小極不復相酬答乃謂客曰身今少惡裴逸民亦近

在此君可往問

晉諸公贊曰裴顧談理與王夷甫不相推下

裴成公作崇有論時人攻難之莫能折唯王夷甫來如

小屈時人即以王理難裴理還復申

晉諸公贊曰自魏太常夏侯玄步兵

校尉阮籍等皆著道德論于時侍中樂廣吏部郎劉漢
亦體道而言約尚書令王夷甫講理而才虛散騎常侍
戴奧以學道為業後進庾敳之徒皆希慕簡曠顧疾世
俗尚虛無之理故著崇有二論以折之才博喻廣學者

不能究後樂廣與顧清閒欲說理而顧辭喻豐博廣自以體虛無笑而不復言惠帝起居注曰顧注二論以規虛誕之弊文詞精富為世名論

諸葛玄年少不肯學問始與王夷甫談便已超詣王歎

曰卿天才卓出若復小加研尋一無所愧玄後看莊老

更與王語便足相抗衡

王隱晉書曰玄字茂遠琅邪人魏雍州刺史緒之子有逸才仕

至司空

主簿

衛玠總角時問樂令夢樂云是想衛曰形神所不接而夢豈是想邪樂云因也未嘗夢乘車入鼠穴擣齧鐵

杵皆無想無因故也

周禮有六夢一曰正夢謂無所感動平安而夢也二曰噩夢謂驚愕

而夢也三曰思夢謂覺時所思念也四曰寤夢謂覺時道之而夢也五曰喜夢謂喜說而夢也六曰懼夢謂恐

懼而夢也按樂所言想者蓋思夢也因者蓋正夢也衛思因經日不得遂成病樂

聞故命駕為剖析之衛即小差樂歎曰此兒胷中當必

無膏肓之疾

春秋傳曰晉景公有疾求醫于秦秦伯使醫緩為之未至公夢疾為二豎子曰彼良

醫也懼傷我焉其一曰居肓之上膏之下若我何醫至曰疾不可為也在肓之上膏之下攻之不可達刺之不可

可及藥不至焉公曰良醫也注肓焉也心下為膏

庾子嵩讀莊子開卷一尺許便放去曰了不異人意

晉陽

秋曰庾數字子嵩潁川人侍中峻第三子恢廊有度量
自謂是老莊之徒曰昔未讀此書意嘗謂至理如此今
見之正與人意暗
同仕至豫州長史

客問樂令旨不至者樂亦不復剖析文句直以麈尾柄
确几曰至不客曰至樂因又舉麈尾曰若至者那得去

夫藏舟潛往交臂恒謝一息不留忽焉生滅故飛鳥之
影莫見其移馳車之輪曾不掩地是以去不去矣庸有
至乎至不至矣庸有去乎然則前至不異後至至名所
以生前去不異後去去名所以立今天下無去矣而去
者非假哉既為假
矣而至者豈實哉
於是客乃悟服樂辭約而旨達皆此

類

初注莊子者數十家莫能究其旨要向秀於舊注外為

解義妙析奇致大暢玄風

秀別傳曰秀與嵇康呂安為友趣舍不同嵇康傲世不羈

安放逸邁俗秀雅好讀書二子頗以此嗤之後秀將注莊子先以告康安康安成曰此書詎復須注徒棄人作樂事耳及成以示二子康曰爾故復勝不安乃驚曰莊周不死矣後注周易大義可觀而與漢世諸儒互有彼此未若隱莊之絕倫也秀本傳或言秀遊託數賢蕭肩卒歲都無注述唯好莊子聊應崔謨所注以備遺忘云竹林七賢論云秀為此義讀之者無不起然若已出塵埃而窺絕冥始了視聽之表有神德玄哲能遺天下外萬物雖復使動輓之人顧觀所

唯秋水至樂二篇未竟

而秀卒秀子幼義遂零落然猶有別本郭象者為人薄

行有雋才

文士傳曰象字子玄河南人少有才理慕道好學篤志老莊時人咸以為王弼之亞辟司

空掾太傳主簿

見秀義不傳於世遂竊以為己注乃自注秋水

至樂二篇又易馬蹄一篇其餘衆篇或定點文句而已

文士傳曰象作莊子注最有清辭道旨

後秀義別本出故今有向郭二莊

其義一也

阮宣子有令聞太尉王夷甫見而問曰老莊與聖教同異對曰將無同太尉善其言辟之為掾世謂三語掾衛玠嘲之曰一言可辟何假於三宣子曰苟是天下人望

亦可無言而辟復何假一遂相與為友

名士傳曰阮脩字宣子陳留尉

氏人好老易能言理不喜見俗人時誤相逢即舍去傲然無營家無儋石之儲晏如也琅琊王處仲為鴻臚卿謂曰鴻臚丞差有祿卿常無食能作不脩曰為復可耳遂為鴻臚丞太子洗馬

裴散騎娶王太尉女婚後三日諸壻大會

晉諸公贊曰裴遐字叔道

河東人父緯長水校尉遐少有理稱辟司空掾散騎郎永嘉派人名街字夷甫第四女適遐也

當時名

士王裴子弟悉集郭子玄在坐挑與裴談子玄才甚豐

瞻始數交未快郭陳張甚盛裴徐理前語理致甚微四

坐咨嗟稱快

鄧粲晉紀曰遐以辯論為業善叙名理辭氣清暢冷然若琴瑟聞其言者知與不知

無不
歎服

王亦以為奇謂諸人曰君輩勿為爾將受困寡人

女壻

衛玠始度江見王大將軍

敦別傳曰敦字處仲琅邪臨沂人少有名理累遷青州刺史

史避地江左歷侍中丞相大將軍揚州牧以罪伏誅

因夜坐大將軍命謝幼輿

晉陽

秋曰謝鯤字幼輿陳郡人父衡晉碩儒鯤性通簡好老易善音樂以琴書為業避亂江東為豫章太守王敦引為長史鯤別傳曰鯤四十三卒贈太常玠見謝甚說之都不復顧王遂達

旦微言王永夕不得豫玠體素羸恒為母所禁爾夕忽

極於此病篤遂不起

玠別傳曰玠少有名理善易老自抱羸疾初不於外擅相酬對時友

歎曰衛君不言言必入真武昌見大舊云王丞相過江將軍王敦敦敦與談論咨嗟不能自己

左止道聲無哀樂

嵇康聲無哀樂論略曰夫殊方異俗歌笑不同使錯而用之或聞笑而懼

或聽歌而戚然哀樂之情均也今用均同養生嵇叔夜之情發萬殊之聲斯非音聲之無常乎

養生

養生論

曰夫強著頭而黑麝食柏而香頸處險而癭齒居晉而黃豈惟蒸之使重無使輕芬之使香勿使延哉誠能蒸

以靈芝潤以醴泉無為自得體妙心玄庶言盡意歐陽與羨門比壽王喬爭年何為不可養生哉

言盡意

歐陽堅石

言盡意論略曰夫理得於心非言不暢物定於彼非名不辨名逐物而遷言因理而變不得相與為二矣苟無

其二言無不盡矣

三理而已然宛轉關生無所不入

殷中軍為庾公長史

按庾亮僚屬名及中興書浩為亮司馬非為長史也下都王

丞相為之集桓公王長史王藍田

王述別傳曰述字懷祖太原晉陽人祖湛

父承並有高名述早孤事親孝謹簞瓢陋巷宴安永日由是為有識所知襲爵藍田侯

謝鎮西並

在丞相自起解帳帶麈尾語殷曰身今日當與君共談

析理既共清言遂達三更丞相與殷共相往反其餘諸

賢略無所關既彼我相盡丞相乃歎曰向來語乃竟未

知理源所歸至於辭喻不相負正始之音正當爾耳明

且桓宣武語人曰昨夜聽殷王清言甚佳仁祖亦不寂

寞我亦時復造心顧看兩王掾

王濛王述並為王導所辟輒嬰如生

母狗馨

殷中軍見佛經云理亦應阿堵上

佛經之行中國尚矣莫詳其始年子曰漢

明帝夜夢神人身有日光明日博問羣臣通人傳殺對曰臣聞天竺有道者號曰佛輕舉能飛身有日光殆將其神也於是遣羽林將軍秦景博士弟子王遵等十二人之大月氏國寫取佛經四十二部在蘭臺石室劉子政列仙傳曰歷觀百家之中以相檢驗得仙者百四十人其七十四人已在佛經故撰得七十可以多聞博識者遐觀焉如此即漢成哀之間已有經矣與牟子傳記便為不同魏略西戎傳曰天竺城中有臨兒國浮屠經云其國王生浮圖浮圖者太子也父曰屑頭邪母曰莫邪浮圖者身服色黃髮如青絲爪如銅其母夢白象而孕及生從右脅出而有髻墜地能行七步天竺又有神人曰沙律昔漢哀帝元壽元年博士弟子景慮受大月

氏王使伊存口傳浮屠經曰復豆者其人也漢武故事
曰昆邪王殺休屠王以其衆來降得其金人之神置之
甘泉宮金人皆長丈餘其祭不用牛羊唯燒香禮拜上
使依其國俗祀之此神全類於佛宜當漢武之時其經
未行於中土而但神明事之邪故驗劉向魚豢之說佛
至自哀成之世明矣然則年傳所言四十二者其文今
存非妄蓋明帝遣使廣
求異聞非是時無經也

謝安年少時請阮光祿道白馬論

孔叢子曰趙人公孫龍云白馬非馬馬者

所以命形白者所以命色夫命色者非命形故曰白馬非馬也

為論以示謝於時謝不

即解阮語重相咨盡阮乃歎曰非但能言人不可得正

索解人亦不可得

中興書曰裕甚精論難

褚季野語孫安國

褚裒孫咸已並見

云北人學問淵綜廣博孫

答曰南人學問深通簡要支道林聞之曰聖賢固所忘

言自中人以還北人看書如顯處視月南人學問如牖

中窺日

支所言但譬成掇褚之理也然則學廣則難周難周則識闊故如顯處視月學寡則易覈易覈

則智明故如牖中窺日也

劉真長與殷淵源談劉理如小屈殷曰惡卿不欲作將

善雲梯仰攻

墨子曰公輸般為高雲梯欲以攻宋墨子聞之自魯往聚棠棣足日夜不休十日十

夜而至於郢見楚王曰聞大王將攻宋有之乎王曰然墨子請令公輸般設攻宋之具臣請試守之於是公輸

殷設攻宋之計墨子縈帶守之輸九攻之而墨子九卻之不能入遂報兵回

殷中軍云康伯未得我牙後慧

浩別傳曰浩善老易能清言康伯浩甥也甚愛

之

謝鎮西少時聞殷浩能清言故往造之殷未過有所通

為謝標榜諸義作數百語既有佳致兼辭條豐蔚甚足以動心駭聽謝注神傾意不覺流汗交面殷徐語左右

取手巾與謝郎拭面

按殷浩大謝尚三歲便是時派或當貴其勝致故為之揮汗

宣武集諸名勝講易

易乾鑿度曰孔子曰易者易也變易也不易也三成德為道包籒者

易也其德也光明四通日月星辰布八卦序四時和也
變也者天地不變不能成朝夫婦不變不能成家不易
者其位也天在上地在下君南面臣北面父坐子伏此
其不易也故易者天地人道也鄭玄序易曰易之為名
也一言而涵三義簡易一也變易二也不易三也繫辭
曰乾坤易之蘊也易之門戶也又曰乾確然示人易矣
坤隤然示人簡矣易則易知簡則易從此言其簡易法
則也又曰其為道也屢遷變動不居周流六虛上下無
常剛柔相易不可以為典要唯變所適此則言其從時
出入移動也又曰天尊地卑乾坤定矣卑高以陳貴賤
位矣動靜有為剛柔斷矣此則言其張設布
列不易也據此三義而說易之道廣矣大矣

日說一卦

簡文欲聽聞此便還曰義自當有難易其以一卦為限

邪

有北來道人好才理與林公相遇於瓦官寺講小品于
時竺法深孫興公悉共聽此道人語屢設疑難林公辯
荅清析辭氣俱爽此道人每輒推屈孫問深公上人當
是逆風家向來何以都不言庾法暢人物論曰法深學
義淵博名聲蚤著弘道法
也深公笑而不荅林公曰白旃檀非不馥焉能逆風師
也
論曰波利質多天樹
其香則逆風而聞深公得此義夷然不屑

孫安國往殷中軍許共論往反精苦客主無間左右進
食冷而復煖者數四彼我奮擲麈尾悉脫落滿餐飯中

賓主遂至莫忘食殷乃語孫曰卿莫作強口馬我當穿

卿鼻孫曰卿不見決鼻牛人當穿卿頰

續晉陽秋曰孫盛善理義時中

軍將軍殷浩擅名一時能與劇談相抗者唯盛而已

莊子逍遙篇舊是難處諸名賢所可鑽味而不能拔理

於郭向之外支道林在白馬寺中將馮太常共語

馮氏譜曰

馮懷字祖思長樂人歷太常護國將軍

因及逍遙支卓然標新理於二家

之表立異義於衆賢之外皆是諸名賢尋味之所不得

後遂用支理

向子期郭子玄逍遙義曰夫大鵬之上九萬尺鷃之起偷枋小大雖差各任其性苟

當其分道遙一也。然物之芸芸同資有待，得其所待，然後逍遙耳。唯聖人與物冥而循大變，為能無待而常通。豈獨自通而已？又從有待者不失其所待，不失則同於大通矣。支氏道遙論曰：夫道遙者，明至人之心也。莊生建言大道而寄指鵬鷖，鵬以營生之路曠，故失適於體；外鷖以在近而笑遠，有矜伐於心，內至人乘天正而高興，遊無窮於放浪物物，而不物於物，則遙然不我得玄感，不為不疾而速，則逍然靡不適此，所以為逍遙也。若夫有欲當其所足，足於所足，快然有似天真，猶飢者一飽渴者一盈，豈忘蒸嘗於糗糧，絕觴爵於醪醴哉？苟非至足，豈所以逍遙乎？此向郭之注所未盡。

殷中軍

浩也

嘗至劉尹所，清言良久，殷理小屈，遊辭不已。

劉亦不復荅。殷去後，乃云：田舍兒強學人作爾馨語。

劉恢

見已

殷中軍雖思慮通長然於才性偏精忽言及四本便苦

湯池鐵城無可攻之勢

神農書曰夫有石城七仞湯池百步帶甲百萬而無粟者不能

自固也

支道林造即色論

支道林集妙觀章云夫色之性也不自有色色不自有雖色而空故曰色

即為空色復異空

論成示王中郎

王坦之已見

中郎都無言支曰默

而識之乎

論語曰默而識之誨人不倦何有於我哉

王曰既無文殊誰能見

賞

維摩詰經曰文殊師利問維摩詰云何者是菩薩入不二法門時維摩詰默然無言文殊師利歎曰是真

入不二
法門也

王逸少作會稽初至支道林在焉孫興公謂王曰支道
林拔新領異曾懷所及乃自佳卿欲見不王本自有一
往雋氣殊自輕之後孫與支共載往王許王都領域不
與交言須臾支退後正值王當行車已在門支語王曰
君未可去貧道與君小語因論莊子逍遙遊支作數千
言才藻新奇花爛映發王遂披襟解帶留連不能已

支法

師傳曰法師研十地則知頓悟於七住尋莊周則辯聖
人之道遙當時名勝咸味其音旨道賢論以七沙門比

竹林七賢遁比向秀雅尚莊
老二子異時風尚玄同也

三乘佛家滯義支道林分判使三乘炳然諸人在下坐
聽皆云可通支下坐自共說正當得兩入三便亂今義

弟子雖傳猶不盡得

法華經曰三乘者一曰聲聞乘二曰緣覺乘三曰菩薩乘聲聞者悟

四諦而得道也緣覺者悟因緣而得道也菩薩者行六度而得道也然則雖漢得道全由佛教故以聲聞為名也辟支佛得道或聞因緣而解或聽環珮而得悟神能獨建故以緣覺為名也菩薩者大道之人也方便則止行六度真教則通脩萬善功不為已志存廣濟故以大道為名也

許掾詢年少時人以比王荀子

荀子王脩小字也文字志曰脩字敬仁太原晉

陽人父濛司徒左長史脩明秀有美稱善隸行書號曰流逸清舉起家著作佐郎琅邪王文學轉中軍司馬未拜而卒時年二十四昔王弼之沒與脩同年故脩弟熙乃歎曰無愧於古人而年與之齊也

許大不

平時諸人士及於法師並在會稽西寺講王亦在焉許意甚忿便往西寺與王論理共決優劣苦相折挫王遂大屈許復執王理王執許理更相覆疏王復屈許謂支法師曰弟子向語何似支從容曰君語佳則佳矣何至相苦邪豈是求理中之談哉

林道人詣謝公東陽時始總角新病起體未堪勞與林

公講論遂至相苦

東陽謝朗也已見中興書曰朗博涉有逸才善言玄理

母王夫

人在壁後聽之再遣信令還而太傅留之王夫人因自出云新婦少遭家難一生所寄唯在此兒因流涕抱兒以歸謝公語同坐曰家嫂辭情怆慨致可傳述恨不使朝士見

謝氏譜曰朗父據娶太康王韜女名綏

支道林許掾諸人共在會稽王齋頭

簡文

支為法師許為

都講

高逸沙門傳曰道林時講維摩詰經

支通一義四坐莫不厭心許送

一難衆人莫不抃舞但共嗟詠二家之美不辯其理之

所在

謝車騎在安西艱中

安西謝奕已見

林道人往就語將夕乃退

有人道上見者問云公何處來荅云今日與謝孝劇談

一出來

玄別傳曰玄能清言善名理

支道林初從東出住東安寺中

高逸沙門傳曰遁居會稽晉哀帝欽其風味遣

中使至東迎之遁遂辭丘壑高步天邑

王長史宿構精理并撰其才藻往

與支語不大當對王叙致作數百語自謂是名理奇藻

支徐徐謂曰身與君別多年君義言了不長進王大慚

而退

殷中軍讀小品

釋氏辨空經有詳者為大品略者為小品

下二百

籤皆是精微世之幽滯嘗欲與支道林辯之竟不得今

小品猶存

高逸沙門傳曰殷浩能言名理自以有所不達欲訪之於遁遂邂逅不遇深以為恨其為

名識貴重如此之至焉語林曰浩於佛經有所不達人迎林公林乃虛懷欲往王右軍駐之曰淵源思致淵富既未易為敵且己所不解上人未必能通縱使服從亦名不益高若佻脫不合使喪十年所保可不須往

林公亦以為然遂止

佛經以為祛練神明則聖人可致

釋氏經曰一切衆生皆有佛性但能脩習

慧斷煩惱萬行
具足便成佛也

簡文云不知便可登峰造極不然陶練

之功尚不可誣

于法開始與支公爭名後積漸歸支意甚不平遂遁跡
剡下遣弟子出都語使過會稽於時支公正講小品開
戒弟子道林講比汝至當在某品中因示語攻難數十
番云舊此中不可復通弟子如言詣支公正值講因謹
述開意徃反多時林公遂屈厲聲曰君何足復受人寄
載來

名德沙門題目曰于法開才辨從橫以數術弘教
高逸沙門傳曰法開初以義學著名後與支遁有

競故遁居剡
縣更學醫術

殷中軍問自然無心於稟受何以正善人少惡人多諸
人莫有言者劉尹答曰譬如寫水著地正自縱橫流漫

略無正方圓者一時絕歎以為名通

莊子曰天籟者吹萬不同而使其自然

已也郭子玄注曰無既無矣則不能生有有之未生又不能為生然則生生者誰哉塊然而自生耳非我生也我不生物物不生我則自然而已然謂之天然天然非為也故以天言之所以明其自然故也

康僧淵初過江未有知者恒周旋市肆乞索以自營忽
往殷淵源許值盛有賓客殷使坐麤與寒溫遂及義理

語言辭肯曾無愧色領略麤舉一往參詣由是知之

淵僧

氏族所出未詳疑是胡人尚書
令沈約撰晉書亦稱其有義學

殷謝諸人共集

殷浩謝安

謝因問殷眼往屬萬形萬形來入

眼不

咸實論曰眼識不待到而知虛塵假空與明故得
見色若眼到色到色間則無空明如眼觸目則不

能見彼當知眼識不到而知依如此說則眼不
往形不入遙屬而見也謝有問殷無答疑闕文

人有問殷中軍何以將得位而夢棺器將得財而夢矢
穢殷曰官本是臭腐所以將得而夢棺屍財本是糞土
所以將得而夢穢汙時人以為名通

殷中軍被廢東陽

浩黜廢事別見

始看佛經初視維摩詰

僧肇注維

摩經曰維摩詰者秦言淨名蓋法身之大士見居此土以弘道也

疑般若波羅密太多

後見小品恨此語少

波羅密此言到彼岸也經云到者有六焉一曰檀檀者施也二曰毗

黎毗黎者持戒也三曰淨提淨提者忍辱也四曰尸羅尸羅者精進也五曰禪禪者定也六曰般若般若者智慧也然則五者為舟般若為導導則俱絕有相之流升無相之彼岸也故曰波羅密也淵源未暢其致少而疑其多已而究其宗多而患其少也

支道林殷淵源俱在相王許

簡

相王謂二人可試一交

言而才性殆是淵源峭函之固

峭謂二陵之地函函谷關也並秦之險塞王者

之居左思魏都賦
曰峭函帝王之宅

君其慎焉支初作改轍遠之數四交

不覺入其玄中相王撫肩笑曰此自是其勝場安可爭

鋒

謝公因弟子集聚問毛詩何句最佳過稱曰

謝玄小字已見

昔

我往矣楊柳依依今我來思雨雪霏霏公曰訐謨定命

遠猷辰告

大雅詩也毛萇注曰詩大也謨謀也辰時也
鄭玄注曰猷圖也大謀定命謂正月始和布

政於邦國都鄙謂此句偏有雅人深致

張憑舉孝廉出都負其才氣謂必參時彥欲詣劉尹鄉

里及同舉者共笑之張遂詣劉劉洗濯料事處之下坐
唯通寒暑神意不接張欲自發無端頃之長史諸賢來
清言客主有不通處張乃遙於末坐判之言約旨遠足
暢彼我之懷一坐皆驚真長延之上坐清言彌日因留
宿至曉張退劉曰卿且去正當取卿共詣撫軍張還船
同侶問何處宿張笑而不答須臾真長遣傳教覓張孝
廉船同侶惋愕即同載詣撫軍至門劉前進謂撫軍曰
下官今日為公得一太常博士妙選既前撫軍與之話

言咨嗟稱善曰張憑勅宰為理窟即用為太常博士明

帝文章志曰憑字長宗吳郡人有意氣為鄉閭所稱學尚所得敏而有文太守以才選舉孝廉試策高第為煥

所舉補太常博士累遷吏部郎御史中丞

汰法師云六通三明同歸正異名耳

安汰者體器弘簡道

情冥到法師友而善焉一說法汰即安公弟子也經云六通者三乘之功德也一曰天眼通見遠方之色二曰天耳通聞障外之聲三曰身通飛行隱顯四曰它心通水鏡萬慮五曰宿命通神知己往六曰漏盡通慧解累世三明者解脫在心朗照三世者也然則天眼天耳身通它心漏盡此五者皆見在心之明也宿命則過去心之明也因天眼發未來之智則未來心之明也同歸異名義在斯矣

支道林許謝盛德共集王家

許詢謝安王蒙

謝顧謂諸人今日

可謂彥會時既不可留此集固亦難常當共言詠以寫

其懷許便問主人有莊子不正得漁父一篇

莊子曰孔子遊乎緇

惟之林休坐乎杏壇之上孔子弦歌鼓琴奏曲未半有漁者下船而來鬚眉交白被髮揄袂行原以上距陵而

止左手據鄰右手持頤以聽曲終而招子貢子路語曰彼何為者也曰孔氏曰孔氏何治子貢曰服忠信行仁

義飾禮樂選人倫孔氏之所治也曰有土之君歟曰非也漁父曰仁則仁矣恐不免其身孔子聞而求問之遂

言八疵四病以誠孔子

謝看題便各使四坐通支道林先通作七

百許語叙致精麗才藻奇拔衆咸稱善於是四坐各言

懷畢謝問曰卿等盡不皆曰今日之言少不自竭謝後

麤難因自叙其意作萬餘語才峰秀逸

文士志曰安神情秀悟善談玄

連既自難干加意氣擬託蕭然自得四坐莫不厭心支謂謝曰君一往奔詣故復自佳耳

殷中軍孫安國王謝能言諸賢悉在會稽王許殷與孫

共論易象妙於見形

其論略曰聖人知觀器不足以達變故表圓應於著龜圓應不可為

典要故寄妙跡於六爻六爻周流唯化所適故雖一畫而吉凶並彰微一則失之矣擬器託象而慶咎交著繫器則失之矣故設八卦者蓋緣化之影跡也天下者寄見之一形也圓影備未備之象一形兼未形之形故盡

二儀之道不與乾坤齊妙風雨之變不與巽坎同體矣

孫語道合意氣干雲一坐

咸不安孫理而辭不能屈會稽王慨然歎曰使真長來故應有以制彼即迎真長孫意已不如真長既至先令孫自叙本理孫麤說已語亦覺殊不及向劉便作二百許語辭難簡切孫理遂屈一坐同時拊掌而笑稱美良久

僧意在瓦官寺中

未詳僧意氏族所出

王荀子來

荀子王脩小字

與共語

便使其唱理意謂王曰聖人有情不王曰無重問曰聖

人如柱邪王曰如籌筭雖無情運之者有情僧意云誰

運聖人邪荀子不得答而去

諸本無僧意最後一句意疑其闕慶校衆本皆然唯

一書有之故取以成其義然王脩善言理如此論時不近人情猶疑斯文為謬也

司馬太傅問謝車騎惠子其書五車何以無一言入玄

謝曰故當是其妙處不傳

莊子曰惠施多方其書五車其道外駁其言不中謂卵有

毛雞三足馬有卵犬可為羊火不熱目不見龜長於蛇丁子有尾白狗黑連環可解能勝人之口不能服人之

心蓋辯者之圖也

殷中軍被廢徙東陽大讀佛經皆精解唯至事數處不

解

事數謂若五陰十二入四諦十
二因緣五根五力七覺之屬

遇見一道人問所籤

便釋然

殷仲堪精覈玄論人謂莫不研究殷乃歎曰使我解四

本談不翅爾

周祇隆安記曰仲堪
好學而有理思也

殷荊州曾問遠公

張野達法師銘曰沙門釋惠遠鴈門
樓煩人本姓賈氏世為冠族年十二

隨舅令狐氏遊學許洛年二十一欲南渡就范宣子學
道阻不通過釋道安以為師抽簪落髮研求法藏釋曇

翼每資以燈燭之費誦鑒淹遠高悟冥贖安常歎曰道
流東國其在遠乎襄陽既沒振錫南遊結宇靈嶽自年

六十不復出山名被流沙彼國僧衆皆稱漢地有大
乘沙門每至燃香禮拜輒東向致敬年八十三而終

易

以何為體答曰易以感為體殷曰銅山西崩靈鐘東應

便是易耶

東方朔傳曰孝武皇帝時未央宮前殿鐘無故自鳴三日三夜不止詔問太史待詔王朔

朔言恐有兵氣更問東方朔朔曰臣聞銅者山之子山者銅之母以陰陽氣類言之子母相感山恐有崩弛者故鐘先鳴易曰鳴鶴在陰其子和之精之至也其應在後五日內居三日南郡太守上書言山崩延袤二十餘里樊英別傳曰漢順帝時殿下鐘鳴問英對曰蜀崤山崩山於銅為母母崩子鳴非聖朝災後蜀果上言山崩日月相應二說微異故並載之遠公笑而不答

羊孚弟娶王永言女

孚弟輔也羊氏譜曰輔字幼仁泰山人祖指尚書郎父綏中書郎輔

仕至衛軍功曹娶琅邪王納之女字僧首及王家見壻孚送弟俱往時永言

父東陽尚在

王氏譜曰訥之字永言琅邪人祖彪之光祿大夫父臨之東陽太守訥之歷尚書左

丞御史中丞

殷仲堪是東陽女壻亦在坐

殷氏譜曰仲堪娶琅邪王臨之女字

英彦

乎雅善理義乃與仲堪道齊物

莊子篇也

殷難之羊云君

四番後當得見同殷笑曰乃可得盡何必相同乃至四

番後一通殷咨嗟曰僕便無以相異歎為新拔者久之

殷仲堪云三日不讀道德經便覺舌本間強

晉安帝紀曰仲堪有

思理能

清言

提婆初至為東亭第講阿毗曇

出經叙曰僧伽提婆賓人姓瞿曇氏偁明有

深鑒符堅至長安出諸經後渡江達法師請譯阿毗曇
遠法師阿毗曇叙曰阿毗曇心者三藏之要領詠歌之
微言源流廣大管綜衆經領其宗會故作者以心為名
焉有出家開士字法勝以阿毗曇源流廣大卒難尋究
別撰斯部凡二百五十偈以為要解號之曰心罰賓沙
門僧伽提婆少玩斯文因請令譯焉阿毗曇者晉言大
法也道標法師曰阿毗曇者秦言無比法也始發講坐
裁半僧彌便云都已

曉即於坐分數四有意道人更就餘屋自講提婆講竟

東亭問法岡道人曰

法岡未詳氏族

弟子都未解阿彌那得已

解所得云何曰大略全是故當小未精覈耳

出經叙曰提婆以隆

安初遊京師東亭侯王珣迎至舍講阿毗曇提婆宗致
既明振發義奧王僧彌一聽便自講其明義易啓人心

如此未
詳年卒

桓南郡與殷荊州共談每相攻難年餘後但一兩番桓

自歎才思轉退殷云此乃是君轉解

周祇隆安記曰玄善言理棄郡還國

常與殷荊州仲堪終日談論不輟

文帝嘗令東阿王七步中作詩不成者行大法應聲便

為詩曰煮豆持作羹漉菽以為汁萁在釜下燃豆在釜

中泣本自同根生相煎何太急帝深有慚色

魏志曰陳思王植字

子建文帝同母弟也年十餘歲誦詩論及辭賦數萬言善屬文太祖嘗視其文曰汝倩人耶植跪曰出言為論

下筆成章顧當面試奈何倩人時鄴銅雀臺新成太祖
悉將諸子登之使各為賦植援筆立成可觀性簡易不
治威儀與馬服飾不尚華麗每見難問應聲而荅太祖
寵愛之幾為太子者數矣文帝即位封鄴城侯后徙雍
丘復封東阿植每求試不得而國
亟遷易汲汲無權年四十一薨

魏朝封晉文王為公備禮九錫文王固讓不受公卿將
校當詣府敦喻司空鄭冲

冲已見

馳遣信就阮籍求文籍

時在袁孝尼家

袁氏世紀曰準字孝尼陳郡陽夏人父
渙魏郎中令準忠信居正不恥下問唯

恐人不勝已也世事多險故恬退不敢求進著書十萬
餘言荀綽兗州記曰準有儒才大始中位給事中宿

醉扶起書札為之無所點定乃寫付使時人以為神筆

顧愷之晉文章記曰阮籍勸進落有宏致至轉說徐而攝之也一本注阮籍勸進文略曰竊聞明公固讓冲等眷眷實懷愚心以為聖王作制百代同風褒德賞功其來久矣周公藉已成之業據既安之勢光宅曲阜奄有龜蒙明公宜奉聖旨受茲介福也

左太冲作三都賦初成

思別傳曰思字太冲齊國臨淄人父雍起於筆札多所掌練為

殿中御史思早喪母雍憐之不甚教其書學及長博覽名文通聞百家司空張華辟為祭酒賈謐舉為秘書郎謐誅歸鄉里專思著述齊王問請為記室參軍不起時為三都賦未成也后數年疾終其三都賦改定至終乃上初作蜀都賦云金馬電發於高岡碧雞振翼而雲披鬼彈飛凡以礪礪火井騰光以赫曦今無鬼彈故其賦往往不同思為人無吏幹而有文才又頗以叔房自矜故齊人不重也

時人互有譏訾思

意不慙後示張公

張華已見

張曰此二京可三然君文未重

於世宜以經高名之士思乃詢求於皇甫謐

王隱晉書曰謐字士安

定朝那人漢太尉嵩曾孫也祖叔獻潯陵令父叔侯舉孝廉謐族從皆累世富貴獨守寒素所養叔母歎曰昔

孟母以三徙成子曾父以烹豕存教豈我居不卜隣何爾魯之甚乎脩身篤學自汝得之於我何有因對之流

涕謐乃感激年二十餘就鄉里席坦受書造人而問少

有寧日武帝借其書二車遂博覽太子中庶子議郎徵

並不就家謐見之嗟歎遂為作叙於是先相非貳者莫不

歛衽讚述焉思別傳曰思造張載問岷蜀事交接亦疎皇甫謐西州高士摯仲治宿儒知名非思

倫匹劉淵林衡伯輿並早終皆不為思賦序注也凡諸注解皆思自為欲重其文故假時人名姓也

劉伶著酒德頌意氣所寄

名士傳曰伶字伯倫沛鄉人肆意放蕩以宇宙為狹常乘

鹿車攜一壺酒使人荷鍤隨之云死便掘地以埋土木形骸遨遊一世竹林七賢論曰伶處天地間悠悠蕩蕩無所用心常與俗士相忤其人揅袂而起欲必辱之伶和其色曰雞肋豈足以當尊拳其人不覺廢然而返未嘗措意文章終其世凡著酒德頌一篇而已其辭曰有大先生者以天地為一朝萬簪為須臾日月為局牖八荒為庭衢行無轍跡居無室廬幕天席地縱意所行則操卮執瓢動則挈榼提壺唯酒是務焉知其跡有貴介公子縉紳處士聞吾風聲議其所以乃奮袂攘襟怒目切齒陳說禮法是非鮮起先生於是方捧罍承槽銜杯漱醪奮髯箕踞枕麴藉糟無思慮其樂陶陶兀然而醉恍爾而醒靜聽不聞雷霆之聲熟視不見泰山之形不覺寒暑之切肌利欲之感情俯視萬物之擾擾如江漢之載浮萍二豪侍側焉如蜉蝣之與螟蛉

樂令善於清言而不長於手筆將讓河南尹請潘岳為

表

晉陽秋曰岳字安仁滎陽人夙以才穎發名善屬文清綺絕世蔡邕未能過也仕至黃門侍郎為孫秀所

害潘云可作耳要當得君意樂為述已所以為讓標位二百許語潘直取錯綜便成名筆時人咸云若樂不假潘之文潘不取樂之旨則無以成斯矣

夏侯湛作周詩成

文士傳曰湛字孝若譙國人魏征西將軍夏侯淵曾孫也有盛才文章巧

思善補雅詞名亞潘岳歷中書侍郎湛集載其叙曰周詩者南陔白華華黍由庚崇丘由儀六篇有其義而亡其辭湛續其亡故云周詩也示潘安仁安仁曰此非徒溫雅乃別見

孝悌之性

其詩曰既殷斯虔仰說洪恩夕定晨省奉朝侍昏宵中告退雞鳴在門孳孳恭誨夙夜是

敦 潘因此遂作家風詩

岳家風詩載其宗祖之德及自戒也

孫子荆除婦服作詩以示王武子

孫楚集云婦胡母氏也其詩曰時邁不停

日月電流神爽登遐忽已一周禮制有叙告除靈丘臨祠感痛中心若抽

王曰未知文生於

情情生於文

一作文於情生情於文

覽之悽然增伉儷之重

太叔廣甚辯給而摯仲治長於翰墨俱為列卿每至公

坐廣談仲治不能對退著筆難廣廣又不能答

王隱晉書曰廣

字季思東平人拜成都王為太弟欲使詣洛廣子孫多在洛慮害乃自殺 摯廣字仲治京兆長安人祖茂秀才

父模太僕卿虞少好學師事皇甫謐善校練文義多所著述歷秘書監太常卿從惠帝至長安遂流離鄠杜間性好博古而又籍蕩盡永嘉五年洛中大饑遂餓而死虞與廣名位略同廣長口才虞長筆才俱少政事衆坐廣談虞不能對廣退筆難廣廣不能答於是更相嗤笑紛然於世廣無可記虞多所錄於斯為勝也

江左殷太常父子並能言理亦有辯訥之異揚州口談

至劇太常輒云汝更思吾論

中興書曰殷融字洪遠陳郡人桓彝有人倫鑒見融

甚歎美之著象不盡意大賢須易論理義精微談者稱焉兄子浩亦能清言每與浩談有時而屈退而著論融更居長為司徒左西屬飲酒善舞終日嘯詠未嘗以世務自嬰累遷吏部尚書太常卿卒

庾子嵩作意賦成

晉陽秋曰鼓永嘉中為石勒所害先是鼓見王室多難知終嬰其禍乃作

意賦以寄懷

從子文康見問曰若有意邪非賦之所盡若無

意邪復何所賦答曰正在有意無意之間

郭景純詩云林無靜樹川無停流

王隱晉書曰郭璞字景純河東聞喜人父

瑗建平太守璞別傳曰璞奇博多通文藻聚麗才學賞豫足參上流其詩賦誄頌並傳於世而訥於言造次詠語常人無異又不持儀檢形質續索縱情娛情時有醉飽之失友人于令升戒之曰此伐性之斧也璞曰吾所受有分恒恐用之不盡豈酒色之能害王敦取為參軍敦縱兵都輦乃咨以大事璞極言成敗不為回屈敦忌而害之詩璞

阮孚云

阮孚別見

泓曄蕭瑟實不可言每讀此

文輒覺神超形越

庾闡始作揚都賦道溫庾云溫挺義之標庾作民之望

方響則金聲比德則玉亮庾公聞賦成求看兼贈賦之

闡更改望為雋以亮為潤云

中興書曰闡字仲初潁川人太尉亮之族也少孤九

歲便能屬文遷散騎侍郎領大著作為揚都賦邈絕當時五十四卒

孫興公作庾公誄袁羊曰見此張緩于時以為名賞

袁氏

家傳曰喬有文才

庾仲初作揚都賦成以呈庾亮亮以親族之懷大為其名價云可三二京四三都於此人人競寫都下紙為之

貴謝太傅云不得爾此是屋下架屋耳事事擬學而不

免儉狹

王隱論揚雄太玄經曰玄經雖妙非益也是以古人謂其屋下架屋

習鑿齒史才不常宣武甚器之未三十便用為荊州治

中鑿齒謝朓亦云不遇明公荊州老從事耳後至都見

簡文返命宣武問見相王何如答云一生不曾見此人

從此忤旨出為衡陽郡性理遂錯於病中猶作漢晉春

秋品評卓逸

續晉陽秋曰鑿齒少而博學才情秀逸溫甚奇之自州從事歲中三轉至治中後以

忤旨左遷戶曹叅軍衡陽太守在郡著晉漢春秋斥溫
覬覦之心也鑿齒集載其論略曰靜漢末累世之交爭

廓九域之蒙晦大定千載之成功者皆司馬氏也若以魏有代王之德則不足有靜亂之功則孫劉鼎立共王秦政猶不見叙於帝王況暫制數州之衆哉且漢有像周之業則晉無所承魏之迹矣春秋之時吳楚稱王若非有德彼必自係於周不推吳楚也況長轡廟堂吳蜀兩定天下之功也

孫興公云三都二京五經鼓吹

言此五賦是經典之羽翼

謝太傅問主簿陸退

陸氏譜曰退字黎民吳郡人高祖凱吳丞相祖仰吏部郎父伊州主

簿退仕至光祿大夫

張憑何以作母誄而不作父誄退答曰故當

是丈夫之德表於事行婦人之美非誄不顯

陸氏譜曰退憑壻也

王敬仁年十三作賢人論長史送示真長真長答曰見

敬仁所作論便足參微言

脩集載其論曰或問易稱賢人黃裳元吉苟未能闇與理

會何得不求通求通則有損有損則元吉之稱將虛設乎答曰賢人誠未能闇與理會然求通即通比之於理猶一豪之領一梁一豪之領一梁雖於理有損不足以撓梁賢有情之至寡豪有形之至小豪不至撓梁於賢人何有損之者哉

孫興公云潘文爛若披錦無處不善

續文章志曰岳為文選言簡章清綺

絕倫陸文若排沙簡金往往見寶

文章傳曰機舌屬文司空張華見其文章篇篇

稱善猶識其作文太治謂曰人之作文患於不才至于為文乃患才多也

簡文稱許掾云玄度五言詩可謂妙絕時人

續晉陽秋曰詢有才

藻善屬文自司馬相如王褒楊雄諸賢世尚賦頌皆體
則詩騷傍綜百家之言及至建安而詩章大盛逮乎西
朝之末潘陸之徒雖時有質文而宗歸不異也正始中
王弼何晏好莊老玄勝之談而世遂貴焉至過江佛理
尤盛故郭璞五言始會合道家之言而韻之詢及太原
孫綽轉相祖尚又加以三世之辭而詩騷之體盡矣詢
綽並為一時文宗自此作者
悉體之至義熙中謝混始改

孫興公作天台賦成以示范榮期

中興書曰范啓字榮期慎陽人父堅護軍

啓以才義顯於世仕至黃門郎

云卿試擲地要作金石聲范曰恐子之

金石非宮商中聲然每至佳句

赤城霞起而建標瀑布飛流而界道此賦之佳

處輒云應是我輩語

桓公見謝安石作簡文謚議看竟擲於坐上諸客曰此

是安石碎金

劉謙之晉紀載安議曰謹按謚法一德不懈曰簡道德博聞曰文易簡而天下之理

得觀乎人文化成天下儀之景行猶有彷彿宜尊號曰太宗謚曰簡文

袁虎少貧

虎袁宏小字也

嘗為人傭載運租謝鎮西經船行其

夜清風朗月聞江渚間估客船上有詠詩聲甚有情致

所誦五言又其所未嘗聞歎美不能已即遣委曲訊問

乃是袁自詠其所作詠史詩因此相要大相賞得

續晉陽秋

曰虎少有逸才文章絕麗曾為詠史詩是其風情所寄少孤而貧以運租為業鎮西謝尚時鎮牛渚乘秋佳風月

率爾與左右微服泛江會虎在運租船中諷詠聲既清
會辭文藻拔非尚所曾聞遂往聽之乃遣問訊荅曰是
袁臨汝郎誦詩即其詠史之作也尚佳其率
有勝致即遣要迎談話申旦自此名譽日茂

孫興公云潘文淺而淨陸文深而蕪

裴郎作語林始出大為遠近所傳時流年少無不傳寫

各有一通載王東亭作經王公酒壚下賦甚有才情

裴氏

家傳曰裴榮字榮期河東人父稱豐城令榮期少有風
姿才氣好論古今人物撰語林數卷號曰裴子檀道鸞
謂裴松之以為啓作
語林榮儻別名啓乎

謝萬作八賢論與孫興公往反小有利鈍

中興書曰萬
善屬文能談

鈔定四庫全書

卷上之下

論萬集載其叙四隱四顯為八賢之論謂漁父屈原季
主賈誼楚老龔勝孫登嵇康也其旨以處者為優出者
為劣孫綽難之以謂體玄識
遠者出處同歸文多不載
夷字君齊吳郡人祖廡孝廉父
霜少府卿夷辟州主簿不就
謝後出以示顧君齊
顧曰我亦作知卿當無

所名

桓宣武命袁彥伯作北征賦

續晉陽秋曰宏從溫征鮮卑故作北征賦宏文之高

者

既成公與時賢共看咸嗟歎之時王珣在坐云恨少

一句得寫字足韻當佳袁即於坐攬筆益云感不絕於

余心邈流風而獨寫公謂王曰當今不得不以此事推

袁

宏集載其賦云聞所聞於相傳云獲麟於此野誕靈物以瑞德奚授體於虞者悲尼父之慟泣似實慟而

非假豈一物之足傷實致傷於天下感不絕於余心邈流風而獨寓晉陽秋曰宏嘗與王珣伏滔同侍溫坐溫今滔讀其賦至致傷於天下於此改韻云此韻所詠慨深千載今於天下之後便移韻於寫送之致如為未盡滔乃云得益寫二句或當小勝桓公語宏卿試思益之宏應聲而益王伏稱善

孫興公道曹輔佐才如白地明光錦

中興書曰曹毗字輔佐譙國人魏大

司馬休曹孫也好文籍能屬詞累遷太學博士尚書郎光祿勳

裁為負版袴論語曰孔子負版

者鄭氏注曰版謂邦國籍也負之者賤隸人也非無文采酷無裁製

袁彥伯作名士傳成

宏以夏侯太初何平叔王輔嗣為正始名士阮嗣宗嵇叔夜山巨源

向子期劉伯倫阮仲容王濬仲為竹林名士裴叔則樂
彦輔王夷甫庾子嵩王安期阮千里衛叔寶謝幼輿為

中朝名士見謝公公笑曰我嘗與諸人道江北事特作狡獪

耳彦伯遂以著書

王東亭到桓公吏既伏閣下桓令人竊取其白事東亭

即於閣下更作無復向一字

續晉陽秋曰珣學涉通敏文高當世

桓宣武北征

溫別傳曰溫以太和四年上疏自征鮮卑

袁虎時從被責免官

會須露布文喚袁倚馬前令作手不輟筆俄得七紙殊

可觀東亭在側極歎其才袁虎云當令齒舌間得利

袁宏始作東征賦都不道陶公胡奴誘之狹室中臨以

白刃

胡奴陶範別見

曰先公勲業如是君作東征賦云何相忽

略宏窘蹙無計便答我大道公何以云無因誦曰精金

百鍊在割能斷功則治人職思靖亂長沙之勲為史所

贊

續晉陽秋曰宏為大司馬記室參軍後為東征賦悉稱過江諸名望時桓溫在南州宏語衆云我決不及

桓宣城伏滔在溫府與宏善苦諫之宏笑而不答滔密以啓溫溫甚忿以宏一時文宗又聞此賦有聲不欲令

人顯問之後遊青山飲酌既歸公命宏同載衆為危懼行數里問宏曰聞君作東征賦多稱先賢何故不及家

君宏荅曰尊公稱謂自非下官所敢專故未呈啓不敢顯之耳溫乃云君欲為何辭宏即荅云風鑒散朗或投

或引身雖可亡道不可墮則宣城之節信為尤也溫泣然而止二說不同故詳載焉

或問顧長康君箴賦何如嵇康琴賦顧曰不賞者作後

出相遺深識者亦以高奇見貴

中典書曰愷之博學有才氣為人遲鈍而自矜

尚為時所笑宋明帝文章志曰桓溫云顧長康體中癡點各半合而論之正平半耳世云有三絕畫絕文絕癡絕續晉陽秋曰愷之矜伐過實諸年少因相稱譽以為戲弄為散騎常侍與謝瞻連省夜於月下長詠自云得先賢風制瞻每遺贊之愷之得此彌自力忘倦瞻將眠語捉脚人令代愷之不覺有異遂幾中旦而後止

殷仲文天才宏瞻

續晉陽秋曰仲文雅有才藻著文數十篇

而讀書不甚廣

博亮歎曰

亮別見

若使殷仲文讀書半袁豹

丘淵之文章叙曰豹字士

蔚陳郡人祖耽歷陽太守父質琅邪內史蜀隆安中著作佐郎累遷太尉長史丹陽尹義熙九年卒才不

減班固

續漢書曰固字孟堅右扶風人幼有雋才學無常師善屬文經傳無不究覽

羊孚作雪贊云資清以化乘氣以霏遇象能鮮即潔成

輝桓脣遂以書扇

中興書曰脣字茂祖譙國人祖冲太尉父嗣江州刺史脣少有清操以恬

退見稱仕至中書令玄敗徙安成郡後見誅

王孝伯在京行散至其弟王睹戶前

睹王與小字也中興書曰與字季明

恭第四弟也仕至侍中恭事敗贈太常

問古詩中何句為最睹思未答孝

伯詠所遇無故物焉得不速老此句為佳

桓玄嘗登江陵城南樓云我今欲為王孝伯作詠因吟

嘯良久隨而下筆一坐之間詠以之成

晉安帝紀曰玄文翰之美高於

一世玄集載其誄叙曰隆安二年九月十七日前將軍青兗二州刺史太原王孝伯薨川岳降神哲人是育既與其靈不貽其福天道茫昧孰測倚伏犬馬反噬豺狼翹陸嶺推高梧林殘故竹人之云亡邦國喪牧於以誄之爰旌芳郁文多不盡載

桓玄初并西夏領荆江二州二府一國

玄別傳曰玄既克殷仲堪後楊

佺期遣使諷朝廷朝廷以玄都督八州領江州荊州二刺史

於時始雪五處俱賀五

版並入玄在聽事上版至即答版後皆粲然成章不相

揉雜

桓玄下都羊孚時為兖州別駕從京來詣門牋云自頃
世故睽離心事淪溷明公啓晨光於積晦澄百流以一
源桓見牋馳喚前云子道子道來何遲即用為記室叅

軍孟昶


別見

為劉牢之主簿

續晉陽秋曰牢之字道堅彭城人以將顯父遁征虜將

軍牢之沈毅多計數為謝玄叅軍苻堅之役以驍猛成功及平王恭轉徐州刺史桓玄下都以牢之為前鋒行征西將軍玄至歸降用為會稽內史欲解其兵奔而縊死詣門謝見云羊侯羊侯百

口賴卿



世說新語卷上之下

欽定四庫全書

子部

世說新語卷中之上

詳校官侍講學士臣平恕

侍讀臣孫球覆勘

總校官編修臣王燕緒

校對官學正臣蔡必昌

謄錄監生臣劉璫

欽定四庫全書

世說新語卷中之上

宋 劉義慶 撰

方正第五

梁 劉孝標 注

陳太丘與友期行期日中過中不至太丘舍去去後乃至元方時年七歲門外戲

陳寔及紀並已見

客問元方尊君在

不答曰待君久不至已去友人便怒曰非人哉與人期行相委而去元方曰君與家君期日中日中不至則是

無信對子罵父則是無禮友人慙下車引之元方入門不顧

南陽宗世林魏武同時而甚薄其為人不與之交及魏武作司空總朝政從容問宗曰可以交未答曰松栢之志猶存世林既以忤旨見疎位不配德文帝兄弟每造

其門皆獨拜牀下其見禮如此

楚國先賢傳曰宗承字世林南陽安衆人父資

有美譽承少而脩德雅正确然不羣徵聘不就聞德而至者如林魏武弱冠屢造其門值賓客猥積不能得言乃伺承起往要之捉手請交承拒而不納帝後為司空輔漢朝乃謂承曰卿昔不顧吾今可為交未承曰松栢

之志猶存帝不說以其名賢猶敬禮之勅文帝修子弟禮就家拜漢中太守武帝平冀州從至鄴陳羣等皆為之拜帝猶以舊情介意薄其位而優其禮就家訪以朝政居賓客之右文帝徵為直諫大夫明帝欲引以為相

以老
固辭

魏文帝受禪陳羣有憾容帝問曰朕應天受命卿何以

不樂羣曰臣與華歆服膺先朝今雖欣聖化猶義形於

色

華嶠譜叙曰魏受禪朝臣三公以下並受爵位華歆以形色忤時徙為司空不進爵文帝久不懌以問尚

書令陳羣曰我應天受命百辟莫不說喜形於聲色而相國及公獨有不怡者何邪羣起離席長跪曰臣與相國曾事漢朝心雖說喜義干其色亦懼陛下實應見憎帝大說歎息良久遂重異之

郭淮作關中都督甚得民情亦屢有戰庸

魏志曰淮字伯濟太原陽

曲人建安中除平原府丞黃初元年奉使賀文帝踐阼而稽留不及羣臣歡會帝正色責之曰昔禹會諸侯於塗山防風氏後至便行大戮今溥天同慶而卿最留遲何也淮曰臣聞五帝先教導民以德夏后政衰始用刑辟今臣遭唐虞之世是以知免防風氏之誅帝說之擢為雍州刺史遷征西將軍淮在關中三十餘年功績顯著遷儀同三
淮妻太尉王凌之妹坐凌事當并誅
魏略曰凌
字彥雲太原祁人歷司空太尉征東將軍密欲立楚王彪司馬宣王自討之凌自縛歸罪遙謂太傅曰卿宜以折簡召我我當不至邪太傅曰以卿非肯逐折簡者也遂使人送至西凌自知罪重試索棺釘以觀太傅意太傅給之凌行至項城夜呼掾屬與決
使者徵攝甚急淮
曰行年八十身名俱滅命邪遂自殺

使戒裝克日當發州府文武及百姓勸淮舉兵淮不許
至期遣妻百姓號泣追呼者數萬人行數十里淮乃命
左右追夫人還於是文武奔馳如徇身首之急既至淮
與宣帝書曰五子哀戀思念其母其母既亡則無五子

五子若殞亦復無淮宣帝乃表特原淮妻

世語曰淮妻當從坐侍御

史往收督將及羌胡渠帥數千人叩頭請淮上表留妻
淮不從妻上道莫不流涕人人扼腕欲劫留之淮五子
叩頭流血請淮淮不忍視乃命追之於是數千騎往追
還淮以書白司馬宣王曰五子哀母不惜其身若無其
母是無五子五子若亡亦無淮也今輒追還若
於法未通當受罪於主者書至宣王乃表原之

諸葛亮之次渭濱關中震動

蜀志曰亮字孔明琅邪陽都人客于荊州躬耕隴畝

好為梁甫吟長八尺每自比管仲樂毅時人莫之許也唯博陵崔州平潁川徐元直謂為信然先主屯新野徐庶見先主曰諸葛孔明卧龍也將軍豈願見之乎先主曰君與俱來庶曰此人可就見不可屈致也先主遂詣亮謂關羽張飛曰孤之有孔明猶魚之有水也累遷丞相益州牧率眾北征卒於渭南焉魏明帝深懼晉宣王戰乃遣辛毗為軍司馬

魏志曰毗字佐治潁川陽翟人累遷衛尉

宣王既與亮對渭而陳亮設誘譎萬方宣王果大怒將欲應之以重兵亮遣間諜覘之還曰有一老夫毅然仗黃鉞當軍門立軍不得出亮曰此必辛佐治也

晉陽秋曰諸葛

亮冠于郿據渭水南原詔使高祖拒之亮善撫御又戎政嚴明且僞軍遠征糧運艱澀利在野戰朝廷每聞其出欲以不戰屈之高祖亦以為然而擁大軍禦侮于外不宜遠露怯弱之形以虧大勢故秣馬坐甲每見吞併之威亮雖挑戰或遺高祖巾幘巾幘婦女之飾欲以激怒冀獲曹咎之利朝廷慮高祖不勝忿憤而衛尉辛毗骨鯁之臣帝乃使毗仗節為高祖軍司馬亮果復挑戰高祖乃奮怒將出應之毗仗節中門而立高祖乃止將士聞見者益加勇銳識者以人臣雖擁衆千萬而屈於王人大略深長皆如此之類也

夏侯玄既被桎梏

魏氏春秋曰玄字泰初譙國人夏侯之子大將軍前妻兄也風格高朗

弘辯博暢正始中護軍曹爽誅徵為太常內知不免不交人事不畜筆研及太傅薨許允謂玄曰子無復憂矣玄歎曰士宗卿何不見事乎此人猶能以通家年少遇我子元子上不吾容也後中書令李豐惡大將軍執政

遂謀以玄代之大將軍聞其謀誅豐收玄送廷尉干寶
晉紀曰初豐之謀也使告玄玄答曰宜詳之爾不以聞
也故及時鍾毓為廷尉鍾會先不與玄相知因便狎之
於難

玄曰雖復刑餘之人未敢聞命

世語曰玄至廷尉不肯下辭廷尉鍾毓自臨履

玄玄正色曰吾當何辭為令史責人邪卿便為吾作毓
以玄名士節高不可屈而獄當竟夜為作辭令與事相
附流涕以示玄玄視之曰不當若是邪鍾會年少于玄
玄不與交是日於毓坐狎玄玄正色曰鍾君何得如是
名士傳曰初玄以鍾毓志趣不同不與之交玄被收時
毓為廷尉執玄手曰泰初何至於此玄正色曰雖復刑
餘之人不可得交按郭頌西晉人時世相近為晉魏世
語事多詳覈孫盛之徒皆采以著書並云玄距鍾會而
袁宏名士傳最後出不依
前史以為鍾毓可謂謬矣
考掠初無一言臨刑東市顏

色不異

魏志曰玄格量弘濟臨斬顏色不異舉止自若

夏侯泰初與廣陵陳本善本與玄在本母前宴飲

世語曰本

字休元臨淮東陽人魏志曰本廣陵東陽人父矯司徒本歷郡守廷尉所在操綱領舉大體能使羣下自盡有

率御之才不親小事不讀法律本弟騫晉陽秋曰騫字

子無害諤風滑稽而行還徑入至堂戶泰初因起曰可

得同不可得而雜名士傳曰玄以鄉黨貴齒本不論德位年長者必為拜與陳本母前飲騫

來而出其可得同不可得而雜者也

高貴鄉公薨內外誼譁

魏志曰高貴鄉公譁髦字彥士文帝孫東海定王霖之子也初

封郟縣高貴鄉公好學夙成齊王廢羣臣迎之即皇帝位漢晉春秋曰自曹芳事後魏人省徹宿衛無復鎧甲諸門戎兵老弱而已曹髦見威權日去不勝其忿召侍中王沈尚書王經散騎常侍王業謂曰司馬昭之心路人所知也吾不能坐受廢辱今日當與卿自出討之王經諫不聽乃出懷中板令投地曰行之決矣正使死何所恨況不必死邪於是入白太后沈業奔走告昭昭為之備髦遂率僮僕數百鼓譟而出昭弟屯騎校尉佃入遇髦於東止車門左右訶之佃眾欲退太子舍人成濟問逆髦戰於南闕下髦自用劍眾欲退太子舍人成濟問充曰事急矣當云何充曰公畜汝等正為今日今日之事無所問也濟即前刺髦刀出於背魏氏春秋曰帝將誅大將軍詔有司復進位相國加九錫帝夜自將見從僕射李昭黃門從官焦伯等下凌雲臺鎧仗授兵欲因際會遣使自出致討會雨而卻明日遂見王經等出黃素詔于懷曰是可忍也孰不可忍今當決行此事帝遂

拔劍升輦率殿中宿衛倉頭官僮擊戰鼓出雲龍門賈充自外而入帝師潰散帝猶稱天子手劍奮擊衆莫敢逼充率厲將士騎督成倅弟濟以司馬文王問侍中陳

泰曰

魏志曰泰字玄伯司空羣之子也

何以靜之泰云唯殺賈充以謝

天下文王曰可復下此不對曰但見其上未見其下

千寶

晉紀曰高貴鄉公之殺司馬文王召朝臣謀其故太常陳泰不至使其舅荀顗召之告以可不泰曰世之論者以泰方於舅今舅不如泰也子弟內外咸共逼之垂涕而入文王待之曲室謂曰玄伯卿何以處我對曰可誅賈充以謝天下文王曰為吾更思其次泰曰唯有進於此不知其次文王乃止漢晉春秋曰曹髦之薨司馬昭聞之自投於地曰天下謂我何於是召百官議其事昭垂涕問陳泰曰何以居我泰曰公光輔數世功蓋天下

謂當並迹古人垂美於後一旦有殺君之事不亦惜乎
速斬賈充猶可以自明也昭曰公問不可得殺也卿更
思餘計泰厲聲曰意唯有進於此耳餘無足委者也歸
而自殺魏氏春秋曰泰勸大將軍誅賈充大將軍曰卿
更思其他泰曰豈可使
泰復發後言遂嘔血死

和嶠為武帝所親重語嶠曰東宮頃似更成進卿試往

看還問何如答云皇太子聖質如初

晉諸公贊曰嶠字長興汝南西平人

父遒太常知名嶠少以雅量稱深為賈充所知每向世
祖稱之歷尚書太子少傅于寶晉紀曰皇太子有醇古
之風美於信受侍中和嶠數言於上曰季世多偽而太
子尚信非四海之主憂太子不了陛下家事願追思文
武之祚上既重長適又懷齊王朋黨之論弗入也後上
謂嶠曰太子近入朝吾謂差進卿可與荀侍中共往言

及顓奉詔還對上曰太子明識弘新有如明詔問嶠嶠對曰聖質如初上默然晉陽秋曰世祖疑惠帝不可承繼大業遣和嶠荀勗往觀察之既見勗稱歎曰太子德更進茂不同於故嶠曰皇太子聖質如初此陛下家事非臣所盡天下聞之莫不稱嶠為忠而欲灰滅勗也按荀顗清雅性不阿諛校之二說則孫盛為得也

諸葛靚後入晉除大司馬召不起以與晉室有讎常背洛水而坐與武帝有舊帝欲見之而無由乃請諸葛妃呼靚既來帝就太妃間相見禮畢酒酣帝曰卿故復憶竹馬之好不靚曰臣不能吞炭漆身今日復覩聖顏因涕泗百行帝於是慙悔而出

晉諸公贊曰吳亡靚入洛以父誕為太祖所殺誓不

見世祖世祖叔母琅邪王妃靚之姊也帝後因靚在姊間往就見焉靚逃於廁中於是以至孝發名時嵇康亦被法而康子紹死蕩陰之役談者咸曰靚紹靚二人然後知忠孝之道區以別矣

武帝語和嶠曰我欲先痛罵王武子然後爵之嶠曰武

子雋爽恐不可屈帝遂召武子苦責之因曰知愧不諸

公贊曰齊王當出藩而王濟陳請無數又累遣常山王與婦長廣公主共入稽顙陳乞留之世祖甚恚謂王戎

曰我兄弟至親今出齊王自朕家計而甄德王濟連遣婦入來生哭人邪濟等尚爾況餘者乎濟自此被責左

遷國子祭酒武子曰尺布斗粟之謠常為陛下恥之漢書曰

王長高祖少子也有罪文帝徙之於蜀不食而死民作歌曰一尺布尚可縫一斗粟尚可舂兄弟二人不能相

容瓚注曰言一尺布帛可縫而共衣一斗米
粟可舂而共食況以天下之廣而不相容也
他人能令
疎親臣不能使親疎以此愧陛下

杜預之荊州頓七里橋朝士悉祖

王隱晉書曰預字元凱京兆杜陵人漢御

史大夫延年十一世孫祖畿魏太保父恕幽州荊州刺史
預智謀淵博明於治亂常稱立德者非所企及立功
立言所庶幾也累遷河南尹為鎮南將軍都督荊州諸
軍事鎮襄陽以平吳勲封當陽侯預無伎藝之能身不
跨馬射不穿札而每有大事輒在將帥之限贈征南將軍
儀同三司預少賤好豪俠不為

物所許楊濟既名氏雄俊不堪不坐而去

八王故事曰濟字文通弘

農人楊駿弟也有才識累遷太子太保與駿同誅

須臾和長興來問楊右衛何

在客曰向來不坐而去長輿曰必大夏門下盤馬往大

夏門果大閱騎長輿抱內車共載歸坐如初

杜預拜鎮南將軍朝士悉至皆在連榻坐

語林曰中朝方鎮還不與

元凱共坐預征吳還獨榻不與賓客共也

時亦有裴叔則羊祜舒後至曰杜

元凱乃復連榻坐客不坐便去

晉諸公贊曰羊琇字稱舒泰山人通濟有才幹

與世祖同年相善謂世祖曰後富貴時見用作領護軍各十年世祖即位累遷左將軍特進

杜請裴

追之羊去數里住馬既而俱還杜許

晉武帝時荀勗為中書監

虞預晉書曰勗字公曾潁川潁陰人漢司空爽曾孫也十

餘歲能屬文外祖鍾繇曰此兒當及其曾祖
為安陽令民生為立祠累遷侍中中書監
和嶠為令

故事監令由來共車嶠性雅正常疾勗諂諛
王隱晉書曰勗性佞

媚譽太子出齊王當時私議損國害民孫
劉之匹也後世若有良史當著佞倖傳
後公車來嶠

便登正向前坐不復容勗勗方更覓車乃得去監令各

給車自此始
曹嘉之晉紀曰中書監令常同車入朝至
和嶠為令而荀勗為監嶠意強抗專車而

坐乃使監令異
車自此始也

山公大兒著短恰車中倚武帝欲見之山公不敢辭問

兒兒不肯行時論乃云勝山公
晉諸公贊曰山該字伯倫司徒濤長子也雅有

器識仕至

左衛將軍

向雄為河內主簿有公事不及雄而太守劉淮橫怒遂與杖遣之雄後為黃門郎劉為侍中初不交言武帝聞之敕雄復君臣之好雄不得已詣劉再拜曰向受詔而來而君臣之義絕何如於是即去武帝聞尚不和乃怒

問雄曰我令卿復君臣之好何以猶絕

漢晉春秋曰雄字茂伯河內人

世語曰雄有節槩仕至黃門郎護軍將軍按王隱孫盛不與故君相聞議曰昔在晉初河內溫縣領校向雄送御犢牛不充呈郡輒隨比送洛值天大熱郡送牛多暍死臺法甚重太守吳奮召雄與杖雄不受杖曰郡牛者

亦死也。呈牛者亦死也。奮大怒。下雄獄。將大治之。會司隸辟雄都官從事。數年為黃門侍郎。奮為侍中。同省相避。不相見。武帝聞之。給雄酒禮。使詣奮解。雄乃奉詔。此則非劉淮也。晉諸公贊曰。淮字君平。沛國杼秋人。少以清正稱。累遷河內太守。侍中尚書僕射司徒。雄曰。古之君子進人以禮。退人

以禮。今之君子進人若將加諸郤。退人若將墜諸淵。臣

於劉河內。不為戎首。亦已幸甚。安復為君臣之好。武帝

從之。禮記曰。穆公問於子思曰。為舊君反服。古邪。子思

曰。禮。今之君子進人若將加諸郤。退人若將墜諸淵。無

為戎首。不亦善乎。又何反服之有。鄭玄曰。為兵主求攻伐。故曰戎首也。

齊王冏為大司馬輔政

虞預晉書曰冏字景治齊王攸子也少聰惠及長謙約好施趙

王倫篡位冏起義兵誅倫拜大司馬加九錫政皆決之而恣用羣小不復朝覲遂為長沙王所誅嵇紹

為侍中詣冏咨事冏設宴會召葛旗

齊王官屬名曰旗字虛旗齊王從事

中郎晉陽秋曰齊王起義轉長史既克趙王倫與董艾等專執威權冏敗見誅董艾等八王故

字叔智弘農人祖過魏侍中父綏秘書監艾少好功名不脩士檢齊王起義艾為新汲令赴軍用艾領右將軍

王敗見誅共論時宜旗等白冏嵇侍中善於絲竹公可令操

之遂送樂器紹推卻不受冏曰今日共為歡卿何卻邪

紹曰公協輔王室令作事可法紹雖官卑職備常伯操

絲比竹蓋樂官之事不可以先王法服為伶人之業今
逼高命不敢苟辭當釋冠冕襲私服此紹之心也旗等
不自得而退

盧志於衆坐

世語曰志字子通范陽人尚書珽少子少
知名起家鄴令歷成都王長史衛尉卿尚

書郎問陸士衡陸遜陸抗是君何物

抗已見吳書曰遜字
伯言吳郡人世為冠

族初領海昌令號
神君累遷丞相

答曰如卿於盧毓盧珽

魏志曰毓字
子家涿人父

植有名於世累遷吏部郎尚書選舉先性行而後言
才進司空珽咸熙中為泰山太守字子笏位至尚書士

龍失色

雲別見

既出戶謂兄曰何至如此彼容不相知也

士衡正色曰我父祖名播海內寧有不知鬼子敢爾

氏孔

志怪曰盧充者范陽人家西三十里有崔少府墓充先冬至一日出家西獵見一鵲舉弓而射即中之鵲倒而復起充逐之不覺遠忽見一里門如府舍門中一鈴下有唱家前充問此何府也答曰少府府也充曰我衣惡那得見貴人即有人提襖新衣迎之充著盡可體便進見少府展姓名酒炙數行崔曰近得尊府君書為君索小女婚故相延耳即舉書示充充父亡時雖小然已見父手迹便歔歎無辭崔即救內令女郎莊嚴使充就東廊充至婦已下車立席頭共拜為三日畢還見崔崔曰君可歸矣女有娠相生男當以相還生女當留自養敕外嚴車送客崔送至門執手零涕離別之感無異生人復致衣一襲被褥一副充便上車去如電逝須臾至家居四年三月三日臨水戲忽見一犢車乍浮乍沒既上

岸充往開車後戶見崔氏女與三歲男兒共載充見之
忻然欲捉其手女舉手指後車曰府君見人即見少府
充往問訊女抱兒還充又與金盃別并贈詩曰煌煌靈
芝質光麗何猗猗華艷當時顯嘉異表神奇含英未及
秀中夏懼霜萎榮曜長幽滅世路永無施不悟陰陽運
哲人忽來儀會淺離別速皆由靈與祇何以贈余親金
盃可願兒愛恩從此別斷絕傷肝脾充取兒盃及詩忽
不見二車處將兒還四坐謂是鬼魅僉遙唾之形如故
問兒誰是汝父兒逕就充懷衆初怪惡傳省其詩慨然
歎死生之玄通也充詣市賣盃高舉其價不欲速售冀
有識者歎有一老婢問充得盃之由還報其大家即女
姨也遣視之果是謂充曰我姨姊崔少府女未嫁而亡
家親痛之贈一金盃著棺中今視卿盃甚似得盃本末
可得聞不充以事對即詣充家迎兒兒有崔氏狀又似
充貌姨曰我舅甥三月末間產父曰春煥溫也願休強
也即字溫休溫休蓋幽婚也其兆先彰矣兒遂成為令

器歷數郡二千石皆著績其後生植為漢
尚書植子毓為魏司空冠蓋相承至今也
議者疑二陸
優劣謝公以此定之

羊忱性甚貞烈趙王倫為相國忱為太傅長史乃版以
參相國軍事使者卒至忱深懼豫禍不暇被馬於是帖
騎而避使者追之忱善射矢左右發使者不敢進遂得
免

文字志曰忱字長和一名陶泰山平陽人世為冠族
父繇車騎掾忱歷太傅長史揚州刺史遷侍中永嘉

五年遭亂被
害年五十餘

王太尉不與庾子嵩交

王夷甫
庾敳

庾卿之不置王曰君不

邪論衡曰世謂人死為鬼非也人死不為鬼無知不能害人如審鬼者死人精神人見之宜從裸袒之形無為見衣帶被服也何則衣無精神也由此言之見衣服象人則形體亦象人象人知非死人之精神也凡天地之間有鬼非人死之精神也

元皇帝既登阼以鄭后之寵欲舍明帝而立簡文時議者咸謂舍長立少既於理非倫且明帝以聰亮英斷益

宜為儲副周王諸公並苦爭懇切

中興書曰鄭太后字阿春滎陽人少孤先

嫁田氏夫亡依舅吳氏時中宗敬后虞氏先崩將納吳氏后與吳氏女遊後園有言之於中宗者納為夫人甚寵生簡文帝即位唯刁玄亮獨欲奉少主以阿帝旨元

尊之曰文宣太后

帝便欲施行慮諸公不奉詔於是先喚周侯丞相入然

後欲出詔付司

司

周王既入始至階頭帝逆遣傳詔過

使就東廂周侯未悟即卻略下階丞相披撥傳詔徑至

御牀前曰不審陛下何以見臣帝默然無言乃探懷中

黃紙詔裂擲之由此皇儲始定周侯方慨然愧歎曰我

常自言勝茂弘今始知不如也

中興書曰元皇以明帝及琅邪王裒並非敬后

所生而謂裒有大成之度勝於明帝因從容問王導曰
立子以德不以年今二子孰賢導曰世子宣城俱有爽
明之德莫能優劣如此故當以年於是更封裒為琅邪
王而此與世說互異然法盛采撫典故以何為實且從

容諷諫理或可安豈有登階一言曾無奇說便為之改計乎

王丞相初在江左欲結援吳人請婚陸太尉對曰培塿

無松栢薰蕕不同器

杜預左傳注曰培塿小阜松栢大木也薰香草蕕臭草

玩雖

不才義不為亂倫之始

玩已見

諸葛恢大女適太尉庾亮兒

恢別傳曰恢字道明琅邪陽都人祖誕司空父靚亦

知名恢少有令聞稱為明賢避難江左中宗召補主簿累遷尚書令庾氏譜曰庾亮子會娶恢女名文彪庾會

別見次女適徐州刺史羊忱兒

羊氏譜曰羊楷字道茂祖繇車騎掾父忱侍中楷仕

至尚書郎娶諸葛恢次女

亮子被蘇峻害改適江彪

彪別見

恢兒娶鄧

攸女

諸葛氏譜曰恢子衡字峻文仕至榮陽太守娶河南鄧攸女

于時謝尚書求其

小女婚恢乃云羊鄧是世婚江家我顧伊庾家伊顧我

不能復與謝衰兒婚

永嘉流人名曰衰字幼儒陳郡人父衡博士衰歷侍中吏部尚書吳

國內

及恢亡遂婚

謝氏譜曰衰子石娶恢小女名文熊中興書曰石字石奴歷尚書令聚斂

無厭取

於是王右軍往謝家看新婦猶有恢之遺法威

儀端詳容服光整王歎曰我在遣女裁得爾耳

周叔治作晉陵太守周侯仲智往別叔治以將別涕泗不止仲智恚之曰斯人乃婦女與人別唯啼泣便舍去

鄧粲晉紀曰周謨字叔治顓次弟也仕至中護軍嵩字仲智謨兄也性殺直果俠每以才氣陵物顓被害王敦使人弔焉嵩曰亡兄天下有義人為天下無義人所殺復何所弔敦甚銜之猶取為從事中郎因事誅嵩晉陽秋曰嵩事佛臨刑猶誦經周侯獨留與飲酒言話臨別流涕撫其背

曰奴好自愛

阿奴謨小字

周伯仁為吏部尚書在省內夜疾危急時刁玄亮為尚

書令營救備親好之至良久小損

虞預晉書曰刁協字玄亮勃海饒安人少

好學雖不研精而多所博涉中興制度皆稟於協累遷尚書令中宗信重之為王敦所忌舉兵討之奔至江南
敗死明旦報仲智仲智狼狽來始入戶刁下牀對之大泣

說伯仁昨危急之狀仲智手批之刁為辟易於戶側既前都不問病直云君在中朝與和長興齊名那與佞人刁協有情逕便出

王含作廬江郡貪濁狼籍王敦護其兄故於衆坐稱家兄在郡定佳廬江人士咸稱之時何充為敦主簿在坐正色曰充即廬江人所聞異於此敦默然旁人為之反

側充晏然神意自若

中興書曰王敦以震主之威收羅賢雋辟充為主簿充知敦有異志

逡巡疎外及敦稱含有惠政一坐畏敦擊節而已充獨抗之其時衆人為之失色由是忤意出為東海王文學

顧孟著嘗以酒勸周伯仁伯仁不受顧因移勸柱而語

柱曰詎可便作棟梁自遇周得之欣然遂為衿契

徐廣晉紀

曰顧顯字孟著吳郡人驃騎榮兄子少有重名泰興中為騎郎蚤卒時為悼惜之

明帝在西堂會諸公飲酒未大醉帝問今名臣共集何如堯舜時周伯仁為僕射因厲聲曰今雖同人主復那得等於聖治帝大怒還內作手詔滿一黃紙遂付廷尉令收因欲殺之

按明帝未即位顗已為王敦所殺此說非也

後數日詔出周

羣臣往省之周曰近知當不死罪不足至此王大將軍

當下時咸謂無緣爾伯仁曰今主非堯舜何能無過且人臣安得稱兵以向朝廷處仲狼抗剛愎王平子何在顓別傳曰王敦討劉隗時溫太真為東宮庶子在承華門外與顓相見曰大將軍此舉有在義無有濫顓曰君年少希更事未有大臣若此而不作亂共相推戴數年而為此者乎處仲狼抗而強忌平子何在晉陽秋曰王澄為荊州羣賊並起乃奔豫章而恃其宿名猶陵侮敦敦仗勇士路戎等搯而殺之裴子曰平子從荊州下大將軍因欲殺之而平子左右有二十人甚健皆持鐵楯馬鞭平子恒持玉枕大將軍乃攜荊州文武二十人積飲食皆不能動乃偕平子玉枕便持下牀平子手引大將軍帶絕與力士鬪甚苦乃得上屋上久許而死王敦既下住船石頭欲有廢明帝意賓客盈坐敦知帝

聰明欲以不孝廢之每言帝不孝之狀而皆云溫太真
所說溫嘗為東宮率後為吾司馬甚悉之須臾溫來敦
便奮其威容問溫曰皇太子作人何似溫曰小人無以
測君子敦聲色並厲欲以威力使從已乃重問溫太子
何以稱佳溫曰鈎深致遠蓋非淺識所測然以禮侍親
可稱為孝

劉謙之晉紀曰敦欲廢明帝言於衆曰太子
子道有虧溫司馬昔在東宮悉其事矯既正

言敦忿
而愧焉

王大將軍既反至石頭周伯仁往見之謂周曰卿何以

相負對曰公戎車犯正下官忝率六軍而王師不振以

此負公

晉陽秋曰王敦既下六軍敗績顗長史郝嘏及左右文武勸顗避難顗曰吾備位大臣朝廷傾

撓豈可草間求活投身胡虜邪乃與朝士詣敦敦曰近日戰有餘力不對曰恨力不足豈有餘邪

蘇峻既至石頭百僚奔散

王隱晉書曰峻字子高長廣掖人少有才學仕郡主簿舉

孝廉值中原亂招合流舊三千餘家結壘本縣宣示王化收葬枯骨遠近感其恩義咸共宗焉討王敦有功封公遷歷陽太守峻外營將表白鼓自鳴峻自斫鼓曰我鄉里時有此則空城有頃詔書徵峻峻曰臺下云我反豈得活邪我寧石頭望廷尉不能廷尉望山頭乃作亂晉陽秋曰峻率衆二萬濟自橫江至於蔣山王師敗績
唯侍中鍾雅獨在帝側或謂鍾曰見可而進知難而

退古之道也君性亮直必不容於寇讎何不用隨時之
宜而坐待其弊耶鍾曰國亂不能匡君危不能濟而各
遜遁以求免吾懼董狐將執簡而進矣

庾公臨去顧語鍾後事深以相委鍾曰棟折榱崩誰之
責邪庾曰今日之事不容復言卿當期克復之效耳鍾

曰想足下不愧荀林父耳

春秋傳曰楚莊王圍鄭晉使荀林父率師救鄭與楚戰於

邲晉師敗績桓子歸請死晉平公將許之士貞子諫而止後林父敗赤狄於曲梁賞桓子狄臣千室亦賞士伯以瓜衍之田曰吾獲狄田子之功也微子吾喪伯氏矣

蘇峻時孔羣在橫塘為匡術所逼王丞相保存術會稽後賢

記曰羣字敬休會稽山陰人祖竺吳豫章太守父奔全椒令羣有智局仕至御史中丞晉陽秋曰匡術為阜陵令逃亡無行庾亮徵蘇峻術勸峻誅亮遂與峻同反後以宛城降因眾坐戲語令術勸

羣酒以釋橫塘之憾羣答曰德非孔子厄同匡人家語曰孔

子之宋匡簡子以甲士圍之子路怒奮戟將戰孔子止之曰夫詩書之不講禮樂之不習是丘之過也若述先

王之道而為咎者非丘罪也命也夫歌予和汝子路彈劍孔子和之曲三終匡人解甲罷雖陽和布

氣鷹化為鳩至於識者猶憎其眼禮記月令曰仲春之月鷹化為鳩鄭玄曰

鳩播穀也夏小正曰鷹則為鳩鷹也者其殺之時也鳩也者非殺之時也善變而之仁故具之

蘇子高事平

靈鬼志謠徵曰明帝初有謠曰高山崩石自破高山峻也碩峻弟也後諸公誅峻碩

猶據石頭潰散而逃追斬之

王庾諸公欲用孔廷尉為丹陽

孔坦亂離

之後百姓彫弊孔慨然曰昔肅祖臨崩諸君親升御牀

並蒙眷識共奉遺詔孔坦疎賤不在顧命之列既有艱

難則以微臣為先今猶俎上腐肉任人膾截耳於是拂

衣而去諸公亦止

按王隱晉書蘇峻事平陶侃欲將坦上用為豫章太守坦辭母老不行臺

以為吳郡吳郡多名族而坦年少乃授吳興內史不聞尹京

孔車騎與中丞共行人

孔愉別傳曰愉字敬康會稽山陰人初辟中宗參軍討華軼有功封

餘不亭侯愉少時嘗得一龜放於餘不溪中龜中路左顧者數過及後鑄印而龜左顧更鑄猶如此印師以聞愉悟取而佩焉累遷尚書左僕射贈車騎將軍中丞孔羣也

在御道逢匡術賓從甚

盛因往與車騎共語中丞初不視直云鷹化為鳩衆鳥猶惡其眼術大怒便欲刃之車騎下車抱術曰族弟發狂卿為我宥之始得全首領

梅頤嘗有惠於陶公後為豫章太守有事王丞相遣收之侃曰天子富於春秋萬機自諸侯出王公既得錄陶公何為不可放乃遣人於江口奪之

晉諸公贊曰頤字仲真汝南西平人

少好學隱退而求實進止永嘉流人名曰頤領軍司馬
頤弟陶字叔真鄧粲晉紀曰初有諧侃於王敦者乃以
從弟廙代侃為荊州左遷侃廣州侃文武距廙而求侃
敦聞大怒及侃將莅廣州過敦敦陳兵欲害侃敦咨議
參軍梅陶諫敦乃止厚禮而遣之王隱晉書亦
同按二書所敘則有惠於陶是梅陶非頤也 頤見陶

公拜陶公止之頤曰梅仲真郝明日豈可復屈邪

王丞相作女伎施設牀席蔡公先在坐不說而去王亦

不留

蔡司徒別傳曰謨字道明濟陽考城人博學有識
避地江左歷左光祿錄尚書事揚州刺史薨贈司

空

何次道庾季堅二人並為元輔

晉陽秋曰庾冰字季堅
太尉亮之弟也少有檢

操兄亮常器之曰吾家晏平仲累遷車騎將軍江州刺史

成帝初崩于時嗣君未定

何欲立嗣子庾及朝議以外寇方強嗣子沖幼乃立康

帝

中興書曰帝諱岳字世同成帝同母弟也成帝崩即位年二十二

康帝登阼會羣臣

謂何曰朕今所以承大業為誰之議何答曰陛下龍飛

此是庾冰之功非臣之力于時用微臣之議今不覩盛

明之世

晉陽秋曰初顯宗崩庾冰議立長君何充謂宜奉皇子爭之不得充不自安求處外任及冰

出鎮武昌充自京馳還言於帝曰冰不宜出昔年陛下龍飛使晉德再隆者冰之勲也臣無與焉

帝有

慚色

江僕射年少王丞相呼與共碁王手嘗不如兩道許而

欲敵道戲試以觀之江不即下王曰君何以不行江曰

恐不得爾

徐廣晉紀曰江彪字思玄陳留人博學知名兼善弈為中興之冠累遷尚書左僕射護軍

將軍傍有客曰此年少戲迺不惡王徐舉首曰此年少非

唯圍碁見勝

范汪碁品曰彪與王恬等碁第一品導第五品

孔君平疾篤庾司空為會稽省之

庾

相問訊甚至為之

流涕庾既下牀孔慨然曰大丈夫將終不問安國寧家

之術迺作兒女子相問庾聞回謝之請其話言

王隱晉書曰坦

方直而有雅望

桓大司馬詣劉尹臥不起桓彎彈彈劉枕丸迸碎牀褥

間劉作色而起曰使君如馨地寧可鬪戰求勝

中興書曰溫曾

為徐州刺史沛國屬徐州故呼溫使君鬪戰者以溫為將也

桓甚有恨容

劉尹真長已見

後來年少多有道深公者深公謂曰黃吻年少勿為評

論宿士昔嘗與元明二帝王庾二公周旋

高逸沙門傳曰晉元明二

帝游心玄虛託情道味以賓友禮待法師王公庾公傾心側席好同臭味也

王中郎年少時

坦之已見

江彪為僕射領選欲擬之為尚書

郎有語王者王曰自過江來尚書郎正用第二人何得

擬我江聞而止

按王彪之別傳曰彪之從伯導謂彪之曰選曹舉汝為尚書郎幸可作諸王佐

邪此知郎官寒素之品也

王述轉尚書令事行便拜文度曰故應讓杜許藍田云

汝謂我堪此不文度曰何為不堪但克讓自是美事恐

不可闕藍田慨然曰既云堪何為復讓人言汝勝我定

不如我

述別傳曰述常以謂人之處世當先量已而後動義無虛讓是以應辭便當固執其貞正不踰

皆此類

孫興公作庾公誄文多託寄之辭

綽集載誄文曰咨予與公風流同歸擬量

託情視公猶師君子之交相與無私虛中納是吐誠誨非雖實不敏敬佩弦韋永戢話言口誦心悲既成

示庾道恩庾見慨然送還之曰先君與君自不至於此

道恩庾羲小字徐廣晉紀曰羲字叔和太尉亮第三子拔尚率到位建威將軍吳國內史

王長史求東陽撫軍不用

簡文

後疾篤臨終撫軍哀歎曰

吾將負仲祖於此命用之長史曰人言會稽王癡真癡

王濛已見

劉簡作桓宣武別駕後為東曹參軍

劉氏譜曰簡字仲約南陽人祖喬豫

州刺史父挺潁川太守
簡仕至大司馬參軍

頗以剛直見疎嘗聽記簡都無

言宣武問劉東曹何以不下意答曰會不能用宣武亦
無怪色

劉真長王仲祖共行日旰未食有相識小人貽其餐肴

案甚盛真長辭焉仲祖曰聊以充虛何苦辭真長曰小

人都不可與作緣

孔子稱唯女子與小人为難養近之則不遜遠之則怨劉尹之意蓋從此

言也

王脩齡嘗在東山甚貧乏

司州已見

陶胡奴為烏程令

胡奴陶範

小字也陶侃別傳曰範字道則侃第十子也侃諸子中最知名歷尚書秘書監何法盛以為第九子送一船米遺之卻不肯取直答語王脩齡若饑自當就謝仁祖索食不須陶胡奴米

阮光祿

阮裕已見

赴山陵至都不往殷劉許過事便還諸人

相與追之既亦知時流必當逐已乃遯疾而去至方山

不相及

中興書曰裕終日頽然無所錯綜而物自宗之

劉尹時為會稽乃歎曰

我入當泊安石渚下耳不敢復近思曠傍伊便能捉杖

打人不易

王劉與桓公共至覆舟山看酒酣後劉牽脚加桓公頸

桓公甚不堪舉手撥去既還王長史語劉曰伊詎可以

形色加人不

溫別傳曰溫有豪邁風氣也

桓公問桓子野謝安石料萬石必敗何以不諫

子野桓伊小字

也續晉陽秋曰伊字叔夏譙國鉅人父景護軍將軍伊

少有才藝又善聲律加以標悟省率為王蒙劉惔所知

累遷豫州刺史

贈右將軍

子野答曰故當出於難犯耳桓作色曰萬

石撓弱凡才有何嚴顏難犯

羅君章曾在人家主人令與坐上客共語答曰相識已

多不煩復爾

羅府君別傳曰含字君章桂陽東陽人蓋楚熊姓之後啟土羅國遂氏族焉後寓湘

境故為桂陽人含臨海太守彥曾孫榮陽太守綏少子也桓宣武辟為別駕以官廨諠擾於城西池小洲上立茅茨伐木為牀織葦為席布衣蔬食晏若有餘桓公嘗謂眾坐曰此自江左之清秀豈唯荆楚而已累遷散騎常侍廷尉長沙相致仕中散大夫門施行馬含自在官舍有一白雀棲集堂宇及致仕還家階庭忽蘭菊挺生豈非至行之徵邪

韓康伯病拄杖前庭消搖

韓伯已見

見諸謝皆富貴轟隱交

路歎曰此復何異王莽時

漢書曰王莽宗族凡十侯五大司馬

王文本度為桓公長史時桓為兒求王女王許咨藍田

王坦之

之王述
並已見

既還藍田愛念文度雖長大猶抱著郝上文度

因言桓求已女婚藍田大怒排文度下郝曰惡見文度

已復癡畏桓溫面兵那可嫁女與之文度還報云下官

家中先得婚處桓公曰吾知矣此尊府君不肯耳後桓

女遂嫁文度兒

王氏譜曰坦之子愷娶桓溫第二女字伯子中興書曰愷字茂仁歷吳國內史

丹陽尹
贈太常

王子敬數歲時嘗看諸門生擣搗見有勝負因曰南風

不競

春秋傳曰楚伐鄭師曠曰不害吾驟歌南風南風不競多死聲楚必無功杜預曰歌者吹律以詠八

風南風音微故曰不競也

門生輩輕其小兒迺曰此郎亦管中窺豹

時見一斑子敬瞋目曰遠慚荀奉倩近愧劉真長遂拂

衣而去

荀劉已見

謝公聞羊綏佳致意令來終不肯詣

羊氏譜曰綏字仲彥太山人父楷尚

書郎綏仕至中書侍郎

後綏為太學博士因事見謝公公即取以

為主簿

王右軍與謝公詣阮公

阮思曠也

至門語謝故當共推主人

謝曰推人正自難

太極殿始成

徐廣晉紀曰孝武寧康二年尚書令王彪之等啓改作新宮大元三年二月内外軍

六千人始營築至七月而成太極殿高八丈長二十七丈廣十丈尚書謝萬監視賜爵關内侯大匠毛安之闕

中侯

王子敬時為謝公長史謝送版使王題之王有不平

色語信云可擲著門外謝後見王曰題之上殿何若昔

魏朝韋誕諸人亦自為也王曰魏作所以不長謝以為

名言

宋明帝文章志曰太元中新宮成議者欲屈王獻之題榜以為萬代寶謝安與王語次因及魏時起

凌雲閣忘題榜乃使韋仲將縣梯上題之比下須髮盡白裁餘氣息還語子弟云宜絕楷法安欲以此風動其意王解其旨正色曰此奇事韋仲將魏朝大臣寧可使其若此有以知魏德之不長安知其心迺不復逼之

王恭欲請江盧奴為長史晨往詣江江猶在帳中王坐

不敢即言良久乃得及江不應

盧奴江數小字也晉安帝紀曰數字仲凱濟陽

人祖正散騎常侍父彪僕射並以義正器素知名當世數歷位內外簡退著稱歷黃門侍郎驃騎咨議

直

喚人取酒自飲一盃又不與王王且笑且言那得獨飲

江云卿亦復須邪更使酌與王王飲酒畢因得自解去

未出戶江歎曰人自量固為難

宋書曰數即湘州江夷之父也夷字茂遠湘州

史刺

孝武問王爽卿何如卿兄王答曰風流秀出臣不如恭

忠孝亦何可以假人

中興書曰爽忠孝正直烈宗崩王國寶夜開門入為遺詔爽為黃門

郎距之曰大行晏駕太子未立

敢有先入者斬國寶懼乃止

王爽與司馬太傅飲酒太傅醉呼王為小子王曰亡祖

長史與簡文皇帝為布衣之交亡姑亡姊伉儷二宮何

小子之有

中興書曰王濛女諱穆之為哀帝皇后王蘊女諱法惠為孝武皇后

張玄與王建武先不相識

張玄已見建武王忱也晉安帝紀曰忱初作荊州刺史後

為建武將軍

後遇於范豫章許范令二人共語

范甯已見

張因正

坐斂衽王孰視良久不對張大失望便去范苦譬留之

遂不肯住范是王之舅

王氏譜曰王坦之娶順陽郡范汪女名蓋即甯妹也生忱

讓王曰張玄吳士之秀亦見過於時而使至於此深不可解王笑曰張祖希若欲相識自應見詣范馳報張張便束帶造之遂舉觴對語賓主無愧色

雅量第六

豫章太守顧劭

環濟吳紀曰劭字孝則吳郡人年二十七起家為豫章太守舉善以教民風化

大是雍之子劭在郡卒雍盛集僚屬自園棊

江表傳曰雍字元歎

曾就蔡伯喈伯喈賞異之以其名與之吳志曰雍累遷尚書令封陽遂鄉侯拜侯還第家人不知為人不知飲酒

寡言語孫權嘗曰顧侯在坐令人不樂位至丞相

外啓信至而無兒書雖神氣

不變而心了其故以爪掐掌血流沾褥賓客既散方歎

曰已無延陵之高豈可有喪明之責

禮記曰延陵季子適齊及其反也其

長子死葬於贏博之間孔子曰延陵季子吳之習於禮者也往而觀其葬焉其坎深不至於泉其歛以時服既葬而封廣輪掩坎其高可隱也既封左袒右還其封且號者三曰骨肉歸土命也若魂氣則無不之也而遂行孔子曰延陵季子之於禮也其合矣乎子夏哭其子而喪其明曾子弔之曰朋友喪明則哭之曾子哭子夏亦哭曰天乎子之無罪也曾子怒曰商汝何無罪也吾與汝事夫子於洙泗之間退而老於西河之上使西河之民疑汝於夫子爾罪一也喪爾親使民未有聞焉爾罪二也喪爾子喪爾明爾罪三也子夏投其杖而拜

曰吾過矣

於是豁情散哀顏色自若

嵇中散臨刑東市神氣不變索琴彈之奏廣陵散曲終

曰袁孝尼嘗請學此散吾靳固不與廣陵散於今絕矣

晉陽秋曰初康與東平呂安親善安嫡兄遜淫安妻徐氏安欲告遜遣妻以咨於康康喻而抑之遜內不自安陰告安搗母表求徙邊安當徙訴自理辭引康文士傳曰呂安罹事康詣獄以明之鍾會庭論康曰今皇道開明四海風靡邊鄙無詭隨之民街巷無異口之議而康上不臣天子下不事王侯輕時傲世不為物用無益於今有敗於俗昔太公誅華士孔子戮少正卯以其負才亂羣惑衆也今不誅康無以清潔王道於是錄康閉獄臨死而兄弟親族咸與共別康顏色不變問其兄曰向以琴來不邪兄曰以來康取調之為太平引曲成歎曰

太平引於今絕也

太學生三千人上書請以為師不許文王亦

尋悔焉

王隱晉書曰康之下獄太學生數千人請之于時豪俊皆隨康入獄悉解喻一時散遣康竟與

誅安同

夏侯泰初嘗倚柱作書時大雨霹靂破所倚柱衣服焦

然神色無變書亦如故賓客左右皆跌蕩不得住

見顧

書贊語林曰泰初從魏帝拜陵陪列於松栢下時暴雨霹靂正中所立之樹冠冕焦壞左右觀之皆伏泰初顏

色不改臧榮緒又以為諸葛誕也

王戎七歲嘗與諸小兒遊看道邊李樹多子折枝諸兒

競走取之唯戎不動人問之答曰樹在道邊而多子此

必苦李取之信然

名士傳曰戎由是幼有神童之稱也

魏明帝於宣武場上斷虎爪牙縱百姓觀之王戎七歲

亦往看虎承間攀欄而吼其聲震地觀者無不辟易顛

仆戎湛然不動了無恐色

竹林七賢論曰明帝自閣上望見使人問戎姓名而異之

王戎為侍中南郡太守劉肇遺筒中箋布五端戎雖不

受厚報其書

晉陽秋曰司隸校尉劉毅奏南郡太守劉肇以布五十疋雜物遺前豫州刺史王戎

請檻車徵付廷尉治罪除名終身戎以書未達不坐竹林七賢論曰戎報肇書議者僉以為譏世祖患之乃發

口詔曰以戎之為士義豈懷私議者乃息戎亦不謝

裴叔則被收神氣無變舉止自若求紙筆作書書成救

者多乃得免後位儀同三司

晉諸公贊曰楷息瓚取楊駿女駿誅以相婚黨收付

廷尉侍中傅祗證楷素意由此得免名士傳曰楚王之難李肇惡楷名重收將害之楷神色不變舉動自若諸

人請救得免晉陽秋曰楷

與王戎俱加儀同三司

王夷甫嘗屬族人事經時未行遇於一處飲燕因語之

曰近屬尊事那得不行族人大怒便舉標擲其面夷甫

都無言盥洗畢牽王丞相臂與共載去在車中照鏡語

丞相曰汝看我眼光迺出牛背上

王夷甫蓋自謂風神英俊不至與人校

裴遐在周馥所馥設主人

鄧粲晉紀曰馥字祖宣汝南人代劉淮為鎮東將軍鎮壽

陽移檄四方欲奉迎天子元皇使甘卓攻之馥出奔道卒

遐與人圍碁馥司馬行酒

遐正戲不時為飲司馬恚因曳遐墜地遐還坐舉止如

常顏色不變復戲如故王夷甫問遐當時何得顏色不

異答曰直是闇當故耳

一作闇故當耳一作真是闇將故耳

劉慶孫在太傅府一時人士多為所構唯庾子嵩縱心

事外無迹可問後以其性儉家富說太傅令換千萬冀

其有吝於此可乘

晉陽秋曰劉興字慶孫中山人有豪俠才美善交結為范陽王虓所睚眦

薨太傅召之大相委仗用為長史八王故事曰司馬越字元超高密王泰長子少尚布衣之操為中外所歸累

遷司空

太傅於衆坐中問庾庾時頽然已醉幘墮几上

以頭就穿取徐答云下官家故可有兩娑千萬隨公所取於是乃服後有人向庾道此庾曰可謂以小人之慮度君子之心

王夷甫與裴景聲志好不同景聲惡欲取之卒不能回乃故詣王肆言極罵要王答已欲以分謗王不為動色

徐曰白眼兒遂作

晉諸公贊曰邈字景聲河東聞喜人少有通才從兄顧器賞之每與清言

終日達曙自謂理構多如輒每謝之然未能出也歷太傅從事中郎左司馬監東海王軍事少為文士而經事為將雖非其才而以罕重稱也

王夷甫長裴成公四歲不與相知時共集一處皆當時

名士謂王曰裴令令望何足計王便卿裴裴曰自可全

君雅志

裴頠已見

有往來者云庾公有東下意或謂王公可潛稍嚴以備不虞王公曰我與元規雖俱王臣本懷布衣之好若其

欲來吾角巾徑還烏衣

丹陽記曰烏衣之起吳時烏衣營處所也江左初立琅邪諸王

所

居何所稍嚴

中興書曰於是風塵自消內外緝穆

王丞相主簿欲檢校帳下公語主簿欲與主簿周旋無

為知人几案間事

祖士少好財阮遙集好屐並恒自經營同是一累而未

判其得失

祖約別傳曰約字士少范陽道人累遷平西將軍豫州刺史鎮壽陽與蘇峻反峻敗約投

石勒約本幽州冠族賓客填門勒登高望見車騎大驚又使占奪鄉里先人田地地主多恨勒惡之遂誅約晉

陽秋曰阮孚字遙集陳留人咸第二子也少有人有詣智調而無偽異累遷侍中吏部尚書廣州刺史

祖見料視財物客至屏當未盡餘兩小簾著背後傾身障之意未能平或有詣阮見自吹火蠟屐因歎曰未知一生當著幾量屐神色閒暢於是勝負始分

孚別傳曰孚風韻疎

誕少有門風

許侍中顧司空俱作丞相從事爾時已被遇遊宴集聚

略無不同

晉百官名曰許璩字思文義興陽羨人許氏譜曰璩祖豔字子良永興長父裴字季顯烏

程令璩仕至吏部侍郎

嘗夜至丞相許戲二人歡極丞相便命使

入已帳眠顧至曉回轉不得快孰許上牀便哈臺大鼾

丞相顧諸客曰此中亦難得眠處

顧和字君孝少知名族人顧榮曰此吾家

騏驥也必興吾宗仕至尚書令五子治隗淳履之

庾太尉風儀偉長不輕舉止時人皆以為假亮有大兒

數歲雅重之質便自如此人知是天性溫太真嘗隱幔

恒之此兒神色恬然乃徐跪曰君侯何以為此論者謂

不減亮蘇峻時遇害

庾氏譜曰會字會宗太尉亮長子年十九咸和六年遇害

或云

見阿恭知元規非假

阿恭會小字也

褚公於章安令遷太尉記室叅軍

按庾亮啓叅佐名裒時直為叅軍不掌記

室也 名字已顯而位微人未多識公東出乘估客船送故

吏數人投錢唐亭住

錢唐縣記曰縣近海為潮漂沒縣諸豪姓斂錢雇人輦土為塘因以

為名也 爾時吳興沈充為縣令未詳當送客過浙江客出亭

吏驅公移牛屋下潮水至沈令起彷徨問牛屋下是何

物人吏云昨有一傖父來寄亭中

晉陽秋曰吳人以中州人為傖有尊

貴客權移之令有酒色因遙問傖父欲食甌不姓何等

可共語褚因舉手答曰河南褚季野遠近久承公名令

於是大遽不敢移公便於牛屋下修刺詣公更宰殺為

饌具於公前鞭撻亭吏欲以謝慙公與之酌宴言色無異狀如不覺令送公至界

郝太傅在京口遣門生與王丞相書求女壻丞相語郝信君往東廂任意選之門生歸白郝曰王家諸郎亦皆可嘉聞來覓壻咸自矜持唯有一郎在東牀上坦腹卧如不聞郝公云正此好訪之乃是逸少因嫁女與焉

王氏

譜曰逸少羲之小字羲之妻太傅郝鑒女名璿字子房

過江初拜官輿飾供饌羊曼拜丹陽尹客來蚤者並得

佳設日晏漸罄不復及精隨客早晚不問貴賤

曼別傳曰曼字

延祖泰山南城人父暨陽平太守曼頽縱宏任飲酒誕節與陳留阮放等號兗州八達累遷丹陽尹為蘇峻所

害

羊固拜臨海竟日皆美供雖晚至亦獲盛饌時論以

固之豐華不如曼之真率

明帝東宮僚屬名曰固字道安太山人文字志曰固父坦

車騎長史固善草行著名一時避亂渡江累遷黃門侍郎褒其清儉贈大鴻臚

周仲智飲酒醉瞋目還面謂伯仁曰君才不如弟而橫

得重名須臾舉蠟燭火擲伯仁伯仁笑曰阿奴火攻固

出下策耳

孫子兵法曰火攻有五一日火人二曰火積三曰火車四曰火軍五曰火隊凡軍必知五

火之變故以
火攻者明也

顧和始為揚州從事月旦當朝未入頃停車州門外周

侯詣丞相歷和車邊

語林曰周侯飲酒已醉著白袷憑兩人來詣丞相

和覓蝨

夷然不動周既過反還指顧心曰此中何所有顧搏蝨

如故徐應曰此中最是難測地周侯既入語丞相曰卿

州吏中有一令僕才

中興書曰和有操量弱冠知名

庾太尉與蘇峻戰敗率左右十餘人乘小船西奔

晉陽秋曰

蘇峻作逆詔亮都督征討戰于建陽門外三師敗績亮於陳攜二弟奔溫嶠

亂兵相剝掠射

誤中施工應弦而倒舉船上咸失色分散亮不動容徐
曰此手那可使著賊衆迺安

庾小征西嘗出未還婦母阮是劉萬安妻

劉氏譜曰劉綏妻陳留阮

蕃女字幼娥綏別見

與女上安陵城樓上俄頃翼歸策良馬盛興

衛阮語女聞庾郎能騎我何由得見婦告翼

庾氏譜曰翼娶高平

劉綏女字靜女

翼便為於道開鹵簿盤馬始兩轉墜馬墮地意

色自若

宣武

桓溫

與簡文太宰

武陵王晞

共載密令人在輿前後鳴鼓

大叫鹵簿中驚擾太宰惶怖求下與顧看簡文穆然清

恬宣武語人曰朝廷間故復有此賢

續晉陽秋曰帝性溫深雅有局鎮嘗

與桓溫太宰武陵王晞同乘至板橋溫密勅令無因鳴角鼓譟部伍並驚馳溫陽駭異晞大震帝舉止自若音頗無變溫每以此稱其德量故論者謂溫服憚也

王劭王薈共詣宣武

劭薈別傳曰劭字敬倫丞相導第五子清貴簡素研味玄蹟大司馬

桓溫稱為鳳雛累遷尚書僕射吳國內史薈字敬文丞相最小子有清譽夷泰無競仕至鎮軍將軍

正值

收庾希家

中興書曰希字始彥司空冰長子累遷徐兗二州刺史希兄弟貴盛桓溫忌之諷免希官

遂奔于暨陽初郭璞筮冰子孫必有大禍唯固三陽可以以後故希求鎮山陽弟友為東陽希自家暨陽及溫

誅希弟柔倩聞希難逃於海陵後還京口聚眾事敗為溫所誅蒼不自安逡巡欲去劭

堅坐不動待收信還得不定迺出論者以劭為優

桓宣武與郝超議芟夷朝臣條牒既定其夜同宿

續晉陽秋

曰超謂溫雄武當樂推之運遂深自委結溫亦深相器重故潛謀密計莫不預焉

明晨起呼謝

安王坦之入擲疏示之郝猶在帳內謝都無言王直擲

還云多宣武取筆欲除郝不覺竊從帳中與宣武言謝

含笑曰郝生可謂入幕賓也

帳一作帷

謝太傅盤桓東山時與孫興公諸人汎海戲

中興書曰安元居會

稽與支道林王羲之許詢共游處出則漁風起浪涌孫
弋山水入則談說屬文未嘗有處世意也
王諸人色並遽便唱使還太傅神情方王吟嘯不言舟
人以公貌閒意說猶去不止既風轉急浪猛諸人皆誼
動不坐公徐云如此將無歸衆人即承響而回於是審
其量足以鎮安朝野

桓公伏甲設饌廣延朝士因此欲誅謝安王坦之

晉安帝紀

曰簡文晏駕遺詔桓溫依諸葛亮王導故事溫大怒以
為黜其權謝安王坦之所建也入赴山陵百官拜于道
側在位望者戰慄失色
或云自此欲殺王謝
王甚遽問謝曰當作何計謝神

意不變謂文度曰晉祚存亡在此一行相與俱前王之
恐狀轉見於色謝之寬容愈表於貌望階趨席方作洛

生詠諷浩浩洪流桓憚其曠遠乃趣解兵

按宋明帝文章志曰安能

作洛下書生詠而少有鼻疾語音濁後名流多數其詠
弗能及手掩鼻而吟焉桓溫止新亭大陳兵衛呼安及
坦之欲於坐害之王入失厝倒執手版汗流霑衣安神
姿舉動不異於常舉目徧歷溫左右衛士謂溫曰安聞
諸侯有道守在四鄰明公何有壁間著阿堵輩溫笑曰
正自不能不爾於是矜莊之心頓盡命部左右促燕行
觴笑語

移日

王謝舊齊名於此始判優劣

謝太傅與王文度共詣郝超日盱未得前王便欲去謝

曰不能為性命忍俄頃

超得寵桓溫專殺生之威

支道林還東

高逸沙門傳曰遁為哀帝所迎游京邑久心在故山乃拂衣王都還就巖穴

時

賢並送於征虜亭

丹陽記曰太安中征虜將軍謝安立此亭因為名

蔡子叔前

至坐近林公

中興書曰蔡系字子叔濟陽人司徒謨第二子有文理仕至撫軍長史

謝萬

石後來坐小遠蔡暫起謝移就其處蔡還見謝在焉因

合褥舉謝擲地自復坐謝冠幘傾脫乃徐起振衣就席

神意甚平不覺瞋沮坐定謂蔡曰卿奇人殆壞我面蔡

答曰我本不為卿面作計其後二人俱不介意

郝嘉賓欽崇釋道安德問

安和上傳曰釋道安者常山薄柳人本姓衛年十二作沙

門神性聰敏而貌至陋佛圖澄甚重之值石氏亂於陸渾山木食修學為慕容俊所逼乃往襄陽以佛法東流經籍錯謬更為條章標序篇目為之注解自支道林等皆宗其理無疾卒 餉米千斛修書累

紙意寄殷勤道安答直云損米愈覺有待之為煩

謝安南免吏部尚書還東

晉百官名曰謝奉字弘道會稽山陰人謝氏譜曰奉祖端

散騎常侍父鳳丞相主簿奉歷安南將軍廣州刺史吏部尚書

謝太傅赴桓公司馬出

西相遇破岡既當遠別遂停三日共語太傅欲慰其失

官安南輒引以它端雖信宿中途竟不言及此事太傅

深恨在心未盡謂同舟曰謝奉故是奇士

戴公從東出謝太傅往看之謝本輕戴見但與論琴書

戴既無吝色而談琴書愈妙謝悠然知其量

晉安帝紀曰戴逵字

安道譙國人士有清操恬和通任為劉真長所知性甚快暢泰於娛生好鼓琴善屬文尤樂遊燕多與高門風流者遊談者許其通隱屢辭徵命遂著高尚之稱

謝公與人圍碁俄而謝玄淮上信至看書竟默然無言

徐向局客問淮上利害答曰小兒輩大破賊意色舉止

不異於常

續晉陽秋曰初苻堅南寇京師大震謝安無懼色方命駕出墅與兄子玄圍碁夜還乃處

分少日皆辦破賊又無喜容其高量如此謝車騎傳曰
氏賊苻堅傾國大出衆號百萬朝廷遣諸軍距之凡八
萬堅進屯壽陽玄為前鋒都督與從弟琰等選精銳決
戰射傷堅俘獲數萬計得偽輦及雲母車寶器山積錦
罽萬端牛馬驢
騾駝十萬頭匹

王子猷子敬曾俱坐一室上忽發火子猷遽走避不遑

取屐

晉百官名曰王徽之字子猷中興書曰徽之義
之第五子卓犖不羈欲為傲達仕至黃門侍郎子

敬神色恬然徐喚左右扶憑而出不異平常

續晉陽秋
曰獻之雖

不脩賞貫而
容止不妄

世以此定二王神宇

苻堅遊魂近境

堅別見

謝太傅謂子敬曰可將當軸了其

此處

王僧彌謝車騎共王小奴許集

王珣謝玄並已見小奴王薈小字也

僧彌

舉酒勸謝云奉使君一觴謝曰可爾

謝玄曾為徐州故云使君

僧彌

勃然起作色曰汝故是吳興溪中釣碣耳何敢譎張

玄叔

父安曾為吳興玄少時從之遊故珣云然

謝徐撫掌而笑曰衛軍僧彌殊不

肅省乃侵陵上國也

王東亭為桓宣武主簿既承藉有美譽公甚欲其人地
為一府之望初見謝失儀而神色自若坐上賓客即相

貶笑公曰不然觀其情貌必自不凡吾當試之後因月

朝閣下伏公於內走馬直出突之左右皆宕仆而王不

動名價於是大重咸云是公輔器也

續晉陽秋曰珣初辟大司馬掾桓溫

至重之常稱王掾必為黑頭公未易才也

太元末長星見孝武心甚惡之

徐廣晉紀曰太元二十九年九月有蓬星如粉絮

東南行歷須女至央星按太元末唯有此妖不聞長星也且漢文八年有長星出東方文穎注曰長星有光芒或竟天或長十丈或二三丈無常也此星見多為兵革事此後十六年文帝乃崩蓋知長星非闕天子世說虛也
夜華林園中飲酒舉柸屬星云長星勸爾一柸酒自

古何時有萬歲天子

殷荊州有所識作賦是東哲慢戲之流

文士傳曰哲字廣徽陽平元城

人漢太子太傅疎廣後也王莽末廣曾孫孟達自東海避難元城改姓去疎之足以為東氏哲博學多識問無不對元康中有人自嵩高山下得竹簡一枚上兩行科斗書司空張華以問哲哲曰此明帝顯節陵中策文也檢校果然曾為麴賦諸文甚俳

諠三十九歲卒元城為之廢市 殷甚以為有才語王

恭適見新文甚可觀便於手巾函中出之王讀殷笑之不自勝王看竟既不笑亦不言好惡但以如意帖之而已殷悵然自失

羊綏第二子孚少有雋才與謝益壽相好

益壽謝混小字也

嘗

蚤往謝許未食俄而王齊王睹來

王睹已見齊王熙小字也中興書曰熙字

叔和恭次弟尚鄱陽公主太子洗馬早卒

既先不相識王向席有不說色欲

使羊去羊了不眄唯脚委几上詠矚自若謝與王叙寒

溫數語畢還與羊談賞王方悟其奇乃合共語須臾食

下二王都不得餐唯屬羊不暇羊不大應對之而盛進

食食畢便退遂苦相留羊義不住直云向者不得從命

中國尚虛二王是孝伯兩弟

識鑒第七

曹公少時見喬玄玄謂曰天下方亂羣雄虎爭撥而理之非君乎然君實是亂世之英雄治世之姦賊恨吾老矣不見君富貴當以子孫相累

續漢書曰玄字公祖梁國睢陽人少治禮及嚴

氏春秋累遷尚書令玄嚴明有才略長於知人初魏武帝為諸生未知名也玄甚異之魏書曰玄見太祖曰吾見士多矣未有若君者天下將亂非命世之才不能濟也能安之者其在君乎按世語曰玄謂太祖君未有名可交許子將太祖乃造子將子將納馬孫盛雜語曰太祖嘗問許子將我何如人固問然後子將答曰治世之能臣亂世之姦雄太祖大笑世說所言謬矣

曹公問裴潛曰卿昔與劉備共在荊州卿以備才如何

潛曰使居中國能亂人不能為治若乘邊守險足為一

方之主

魏志曰潛字文行河東人避亂荊州劉表待之賓客禮潛私謂王粲司馬芝曰劉牧非霸王之才而欲以西伯自處其敗

無日矣遂南渡適長沙

何晏鄧颺夏侯玄並求傳嘏交而嘏終不許

魏略曰鄧颺字玄茂

南陽宛人鄧禹之後也少得士名明帝時為中書郎以與李勝等為浮華被斥正始中遷侍中尚書為人好貨臧艾以父妾與颺得顯官京師為之語曰以官易富鄧玄茂何晏選不得人頗由颺以黨曹爽誅 諸人

乃因荀彧說合之謂嘏曰夏侯泰初一時之傑士虛心

於子而卿意懷不可交合則好成不合則致隙二賢若

穆則國之休此藺相如所以下廉頗也

史記曰相如以功大拜上卿位

在廉頗右頗怒欲辱之相如每稱疾望見引車避匿其舍人欲去之相如曰夫以秦王之威而吾廷叱之何畏廉將軍哉顧秦彊趙弱秦以吾二人故不敢加兵於趙今兩虎鬪勢不俱生吾以公家急而後私讐也頗聞謝

罪

傳曰夏侯泰初志大心勞能合虛譽誠所謂利口覆

國之人何晏鄧颺有為而躁博而寡要外好利而內無
關籥貴同惡異多言而妬前多言多釁妬前無親以吾
觀之此三賢者皆敗德之人爾遠之猶恐罹禍況可親

之邪後皆如其言

傅子曰：是時何晏以才辯顯於貴戚之間，鄧颺好交通，合徒黨，鬻聲名於

間。間，夏侯玄以貴臣子，少有重名，皆求交於颺。颺不納也。颺，友人荀彧有清識，遠志然，猶勸颺結交云。

晉武帝講武於宣武場，帝欲偃武修文，親自臨幸，悉召

羣臣。山公謂不宜爾，因與諸尚書言。孫吳用兵本意，遂

究論舉坐，無不咨嗟。皆曰：「山少傅乃天下名言。」

史記曰：孫武齊

人吳起，衛人，並善兵法。竹林七賢論曰：咸寧中，吳既平上將為桃林華山之事，息役弭兵，示天下以大安。於是州郡悉去兵，大郡置武吏百人，小郡五十人。時京師猶講武，山濤因論孫吳用兵本意，濤為人常簡默，蓋以為國者不可以忘戰故及之。名士傳曰：濤居魏，晉之間，無所標明，嘗與尚書盧欽言及用兵本意，武帝聞之曰：「山

言也

後諸王驕汰輕邁禍難於是寇盜處處蟻合郡

國多以無備不能制服遂漸熾盛皆如公言時人以謂

山濤不學孫吳而闇與之理會王夷甫亦歎云公闇與

道合

竹林七賢論曰永寧之後諸王構禍狡虜欵起皆如濤言名士傳曰王夷甫推歎濤曖曖為與道合

其深不可測皆此類也

王夷甫父又為平北將軍有公事使行人論不得時夷

甫在京師命駕見僕射羊祜尚書山濤夷甫時總角姿

才秀異叙致既快事加有理濤甚奇之既退看之不輟

乃歎曰生兒不當如王夷甫邪羊祜曰亂天下者必此

子也

晉陽秋曰夷甫父又有簡書將免官夷甫年十七見所繼從舅羊祜申陳事狀辭甚俊偉祜不然之

夷甫拂衣而起祜顧謂賓客曰此人必將以盛名處當世大位然敗俗傷化者必此人也漢晉春秋曰初羊祜以軍法欲斬王戎夷甫又忿祜言其必敗不相貴重天下為之語曰二王當朝世人莫敢稱羊公之有德

潘陽仲見王敦小時謂曰君蜂目已露但豺聲未振耳

必能食人亦當為人所食

晉陽秋曰潘滔字陽仲滎陽人太常尼從子也有文學才

識永嘉末為河南尹過害漢晉春秋曰初王夷甫言東海王越轉王敦為揚州潘滔初為太傅長史言於太傅曰王處仲蜂目已露豺聲未發今樹之江外肆其豪彊之心是賊之也晉陽秋曰敦為太子舍人與滔同僚故

有此言習孫二說便小遷異春秋傳曰楚令尹子上謂世子商臣蜂目而豺聲忍人也

石勒不知書

石勒傳曰勒字世龍上黨武鄉人匈奴之苗裔也雄勇好騎射晉元康中流宕山東

與平原荏平人師歡家庸耳恒聞鼓角鞞鐸之音勒私異之初勒鄉里原上地中生石且長類鐵騎之象國中生人參葩葉甚盛于時父老相者皆云此胡體貌奇異有不可知勸邑人厚遇之人多哂而不信永嘉初豪傑並起與胡王陽等十八騎詣汲桑為左前督桑敗共推勒為主攻下州縣都於襄國後僭正號死謚明皇帝

使人讀漢書聞酈食其勸立六國後刻印將授之大驚

曰此法當失云何得遂有天下至留侯諫迺曰賴有此

耳

鄧粲晉紀曰勒手不能書目不識字每於軍中令人誦讀聽之皆解其意漢書曰項羽急圍漢王於滎陽

漢王與酈食其謀撓楚權食其勸立六國後王令趣刻
印張良入諫以為不可輟食吐哺罵酈生曰豎儒幾敗
乃公事趣
令銷印

衛玠年五歲神襟可愛祖太保曰此兒有異顧吾老不

見其大耳

晉諸公贊曰璿字伯玉河東安邑人少以明
識清允稱傳誼極貴重之謂之甯武子仕至

太保為楚王瑋所害玠別傳曰玠有虛令之秀清勝之
氣在羣伍之中有異人之望祖太保見玠五歲曰此兒
神爽聰令與衆大異
恐吾年老不及見爾

劉越石云華彥夏識能不足彊果有餘

虞預晉書曰華
軼字彥夏平原

人魏太尉歆曾孫也累遷江州刺史傾心下士甚得士
歡心以不從元皇命見誅漢晉春秋曰劉琨知軼必敗

謂其自取之也

張季鷹辟齊王東曹掾在洛見秋風起因思吳中菰菜羹鱸魚膾曰人生貴得適意爾何能羈宦數千里以要

名爵遂命駕便歸俄而齊王敗時人皆謂其見機

文士傳曰

張翰字季鷹父儼吳大鴻臚翰有清才美望博學善屬文造次立成辭義清新大司馬齊王冏辟為東曹掾翰謂同郡顧榮曰天下紛紛未已夫有四海之名者求退良難吾本山林間人無望於時久矣子善以明防前以智慮後榮捉其手愴然曰吾亦與子採南山蕨飲三江

水爾翰以疾歸府以輒去除吏名性至孝遭母艱哀毀過禮自以年宿不營當世以疾終于家

諸葛道明初過江左自名道明名亞王庾之下

中興書曰恢避

難過江與潁川荀道明陳留蔡道明俱有名譽號曰中興三

明時人為之語曰京都三

明各有名蔡氏儒雅荀

葛清先為臨沂令丞相謂曰明府當為黑頭公

語林曰丞相拜司空

諸葛道明在公坐指冠冕曰君當復著此

王平子素不知眉子曰志大其量終當死塢壁間

晉諸公贊

曰王玄字眉子夷甫子也東海王越辟為掾後行陳留太守大行威罰為塢人所害

王大將軍始下楊朗苦諫不從遂為王致力乘中鳴雲露車逕前曰聽下官鼓音一進而捷王先扼其手曰事

克當相用為荊州既而忘之以為南郡

晉百官名曰朗字世彥弘農人

楊氏譜曰朗祖囂典軍校尉父淮冀州刺史王隱晉書曰朗有器識才量善能當世仕至雍州刺史

王敗

後明帝收朗欲殺之帝尋崩得免後兼三公署數十人為官屬此諸人當時並無名後皆被知遇于時稱其知人

周伯仁母冬至舉酒賜三子曰吾本謂度江託足無所爾家有相爾等並羅列吾前復何憂周嵩起長跪而泣曰不如阿母言伯仁為人志大而才短名重而識闇好

乘人之弊此非自全之道當性狼抗亦不容於世唯阿

奴碌碌當在阿母目下耳

鄧粲晉紀曰阿奴當之弟周謨也三周並已見

王大將軍既亡王應欲投世儒世儒為江州王含欲投

王舒舒為荊州含語應曰大將軍平素與江州云何而

汝欲歸之應曰此廼所以宜往也

晉陽秋曰應字安期含子也敦無子養為

嗣以為武衛將軍用為副貳伏誅

江州當人彊盛時能抗同異此非常

人所行及覩衰厄必興愍惻

王彬別傳曰彬字世儒琅邪人祖覽父正並有名德

彬爽氣出儕類有雅正之韻與元帝姨兄弟佐佑皇業累遷侍中從兄敦下石頭害周伯仁彬與顗素善往哭

其尸甚慟既而見敦敦怪其有慘容而問之答曰向哭周伯仁情不能已敦曰伯仁自致刑戮汝復何為者哉彬曰伯仁清譽之士有何罪因數敦曰抗旌犯上殺戮忠良音辭忼慨與淚俱下敦怒甚丞相在坐代為之解命彬曰拜謝彬曰有足疾此來見天子尚不能拜何跪之有敦曰脚疾何如頸疾以親故不害之累遷江州刺史左僕射贈衛將軍

荆州守文豈能作意表行事含不從遂共投

舒舒果沈含父子于江

王舒傳曰舒字處明琅邪人祖覽知名父會御史舒器業簡素

有文武幹中宗用為北中郎將荆州刺史尚書僕射出為會稽太守以父名會累表自陳討蘇峻有功封彭澤侯贈車騎大將軍彬聞應當來密具船以待之竟不得來深以

為恨

舍之投舒舒遣軍逆之舍父子赴水死昔鄺寄賣友見譏况販兄弟以求安舒非人矣

武昌孟嘉作庾太尉州從事已知名褚太傅有知人鑒
罷豫章還過武昌問庾曰聞孟從事佳今在此不庾云
卿自求之褚眄睐良久指嘉曰此君小異得無是乎庾

大笑曰然于時既歎褚之默識又欣嘉之見賞

嘉別傳曰嘉字

萬年江夏鄆人曾祖父宗吳司空祖父揖晉廬陵太守
宗葬武昌陽新縣子孫家焉嘉少以清操知名太尉庾
亮領江州辟嘉部廬陵從事下都還亮引問風俗得失
對曰待還當問從事吏亮舉麈尾掩口而笑語弟翼曰
孟嘉故是盛德人轉勸學從事太傅褚裒有器識亮正
旦大會裒問亮聞江州有孟嘉何在亮曰在坐卿但自
覓裒歷觀久之指嘉曰將無是乎亮欣然而笑喜裒得
嘉奇嘉為裒所得乃益器之後為征西桓溫參軍九月

九日溫遊龍山參寮畢集時佐史並著戎服風吹嘉帽
墮落溫戒左右勿言以觀其舉止嘉初不覺良久如廁
命取還之令孫盛作文嘲之成著嘉坐嘉還即答四坐
嗟歎嘉喜酣暢愈多不亂溫問酒有何好而卿嗜之嘉
曰明公未得酒中趣爾又問聽伎絲不如竹竹不如肉
何也答曰漸近自然轉從事中郎遷長史年五十三而
卒

戴安道年十餘歲在瓦官寺畫王長史見之曰此童非

徒能畫

續晉陽秋曰達善
圖畫窮巧丹青也

亦終當致名恨吾老不見其

盛時耳

王仲祖謝仁祖劉真長俱至丹陽墓所省殷揚州殊有

确然之志

中興書曰浩棲遲積年累聘不至

既反王謝相謂曰淵源不

起當如蒼生何深為憂嘆劉曰卿諸人真憂淵源不起

邪

小庾臨終自表以子園客為代

園客爰之小字也庾氏譜曰爰之字仲真翼第

二子中興書曰爰之有父翼風桓溫徙于豫章年三十六而卒

朝廷慮其不從命未知

所遣乃共議用桓溫劉尹曰使伊去必能克定西楚然

恐不可復制

陶侃別傳曰庾翼薨表其子爰之代為荆州何充曰陶公重勲也臨終高讓丞相未

薨敬豫為四品將軍于今不改親則道恩優游散騎未有超卓若此之授乃以徐州刺史桓溫為安西將軍荆

州刺史宋明帝文章志曰翼表其子代任朝廷畏憚之議者欲以授桓溫時簡文輔政然之劉惔曰溫去必能定西楚然恐不能復制願大王自鎮上流惔請為從軍司馬簡文不許溫後果如惔所算也

桓公將伐蜀在事諸賢咸以李勢在蜀既久承藉累葉

且形據上流三峽未易可克唯劉尹云伊必能克蜀觀

其捕博不必得則不為

華陽國志曰李勢字子仁洛陽臨渭人本巴西宕渠賁人也其

先李特因晉亂據蜀特子雄稱號成都勢祖驤特弟也驤生壽壽篡位自立勢即壽子也晉安西將軍伐蜀勢歸降遷之揚州自起至亡六世三十七年溫別傳曰初朝廷以蜀處險遠而溫衆寡少縣軍深入甚以憂懼而溫直指成都李勢面縛語林曰劉尹見桓公每嬉戲必取勝謂曰卿乃爾好利何不焦頭及伐蜀故有此言

謝公在東山畜妓簡文曰安石必出既與人同樂亦不

得不與人同憂

宋明帝文章志曰安縱心事外疎略常節每畜女妓攜持遊肆也

郗超與謝玄不善符堅將問晉鼎既已狼噬梁岐又虎

視淮陰矣

車頻秦書曰符堅字永固武都氐人也本姓蒲祖父洪詐稱識文改曰符言已當王應符

命也堅初生有赤光流其室及誕背赤色隱起若篆文
幼有美度石虎司隸徐正名知人堅六歲時嘗戲於路
正見而異焉問曰符郎此官街小兒行戲不畏縛邪堅
曰吏縛有罪不縛小兒正謂左右曰此兒有王霸相石
氏亂伯父健及父雄西入關健夢天神使者朱衣冠拜
肩頭為龍驤將軍肩頭堅小字也健即拜為龍驤以應
神命後健僭帝號死子生立凶暴羣臣殺之而立堅堅
立十五年遣長樂公丕攻沒襄陽十九年大興師伐晉

衆號百萬水陸俱進次于項城自項城至長安連旗千里首尾不絕乃遣告晉曰已為晉君子長安城中建廣夏之室今故大舉渡江相迎克日入宅也

于時朝議遣玄北討人間頗有異

同之論唯超曰是必濟事吾昔嘗與共在桓宣武府見使才皆盡雖履屐之間亦得其任以此推之容必能立

勲元功既舉時人咸歎超之先覺又重其不以愛憎匿

善

中興書曰于時氏賊彊盛朝議求文武良將可鎮靖北方者衛大將軍安曰唯兄子玄可任此事中書郎

郝超聞而嘆曰安違衆舉親明也玄必不負其舉

韓康伯與謝玄亦無深好玄北征後巷議疑其不振康

伯曰此人好名必能戰

續晉陽秋曰玄識局貞正有經國之才略

玄聞之甚

忿常於衆中厲色曰丈夫提千兵入死地以事君親故

發不得復云為名

褚期生少時謝公甚知之恒云褚期生若不佳者僕不

復相士

期生褚爽小字也續晉陽秋曰爽字茂弘河南人太傅裒之孫秘書監詔之子太傅謝安見其

少時歎曰若期生不佳我不復論士及長果俊邁有風氣好老莊之言當世榮譽弗之屑也唯與殷仲堪善累

遷中書郎義興太

守女為恭帝皇后

郝超與傅瑗周旋瑗見其二子並總髮超觀之良久謂

瑗曰小者才名皆勝然保卿家終當在兄即傅亮兄弟

也

傅氏譜曰瑗字叔玉北地靈州人歷護軍長史安城太守宋書曰迪字長猷瑗長子也位至五兵尚書贈

太常丘淵之文章錄曰亮字季友迪弟也歷尚書令任光祿大夫元嘉三年以罪伏誅

王恭隨父在會稽王大都來拜墓

恭父蘊王忱並已見

恭暫往

墓下看之二人素善遂十餘日方還父問恭何故多日

對曰與阿大語蟬連不得歸因語之曰恐阿大非爾之

友終乖愛好果如其言

忱與恭為王緒所間終成怨隙別見

車胤父作南平郡功曹太守王胡之避司馬無忌之難

置郡于鄧陰是時肩十餘歲胡之每出嘗于籬中見而異焉謂肩父曰此兒當致高名後遊集恒命之肩長又

為桓宣武所知清通於多士之世官至選曹尚書

續晉陽秋

曰肩字武于南平人父育為郡主簿太守王胡之有知人識裁見謂其父曰此兒當成卿門戶宜資令學問肩就業恭勤博覽不倦家貧不常得油夏月則練囊盛數十螢火以繼日焉及長風姿美劭機悟敏率桓溫在荊州取為從事一歲至治中肩既博學多聞又善於激賞當時每有盛坐肩必同之皆云無車公不樂太傅謝公遊集之日開筵以待之累遷丹陽尹護軍將軍吏部尚書

王忱死西鎮未定朝貴人人有望時殷仲堪在門下雖

居機要資名輕小人情未以方嶽相許晉孝武欲拔親
近腹心遂以殷為荊州事定詔未出王珣問殷曰陝西
何故未有處分殷曰已有人王歷問公卿咸云非王自
計才地必應在已復問非我邪殷曰亦似非其夜詔出
用殷王語所親曰豈有黃門郎而受如此任仲堪此舉
迺是國之亡徵晉安帝紀曰孝武深為晏駕後計擢仲
堪代王忱為荊州仲堪雖有美譽議者
未以方嶽相許也既受腹心之任居上
流之重議者謂其殆矣終為桓玄所敗

賞譽第八上

陳仲舉嘗歎曰若周子居者真治國之器

汝南先賢傳曰周乘字子

居汝南安城人天資聰朗高峙嶽立非陳仲舉黃叔度之儔則不交也仲舉嘗歎曰周子居者真治國之器也

為太山太守

譬諸寶劍則世之干將

吳越春秋曰吳王闔閭請干將作劍

甚有惠政

干將者吳人其妻曰莫邪干將采五山之精六金之英候天地伺陰陽百神臨視而金鐵之精未流夫妻乃剪髮及爪而投之鑪中金鐵乃濡遂成二劍陽曰干將而作龜文陰曰莫邪而作漫理干將匿其陽出其陰以獻闔閭闔閭甚寶重之

世目李元禮謾謾如勁松下風

李氏家傳曰膺嶽峙淵清峻貌貴重華夏稱曰

潁川李府君顧謾如玉山汝南陳仲舉軒軒如千里馬南陽朱公叔謾謾如行松柏之下

謝子微見許子將兄弟曰平興之淵有二龍焉見許子

政弱冠之時歎曰若許子政者有幹國之器正色忠蹇

則陳仲舉之匹

汝南先賢傳曰謝甄字子微汝南邵陵人明識人倫雖郭林宗不及甄之鑒也

見許子將兄弟弱冠時則曰平興之淵有二龍仕為豫章從事許虔字子政平興人體尚高潔雅正寬亮謝子微見虔兄弟歎曰若許子政者幹國之器也虔弟劭聲未發時時人以謂不如虔虔恒撫髀稱劭自以為不及也釋褐為郡功曹黜姦廢惡一郡肅然年三十五卒海內先賢傳曰許劭字子將虔弟也山峙淵停行應規表邵陵謝子微高才遠識見劭十歲時歎曰此乃希世之偉人也初劭拔樊子昭於市肆出虞承賢於客舍召李叔才于無聞擢郭子瑜於小吏廣陵徐孟本來臨汝南聞劭高名召功曹時表紹以公族為濮陽長棄官還副

車從騎將入郡界乃歎曰許子將秉持清格豈可以吾與服見之耶遂單馬而歸辟公府掾敦辟皆不就避地江南卒於

伐惡退不肖范孟博之風

張璠漢紀曰范滂字孟博汝南伊陽

豫章也人為功曹辟公府掾升車攬轡有澄清天下之志百城聞滂高名皆解印綬去為黨事見誅

公孫度目邴原所謂雲中白鶴非燕雀之網所能羅也

魏書曰度字叔濟襄平人累遷冀州刺史遼東太守邴原別傳曰原字根矩東莞朱虛人少孤數歲時過書舍而泣師問曰童子何泣也原曰凡得學者有親也一則願其不孤二則羨其得學中心感傷故泣耳師惻然曰苟欲學不須資也於是就業長則博覽洽聞金玉其行知世將亂避地遼東公孫度厚禮之中國既寧欲還鄉里為度禁絕原密自治嚴謂部落曰移北近郡以觀其意皆曰樂移原舊有捕魚大船請村落皆令熟醉因夜

去之數日度乃覺吏欲追之度曰邴君所謂雲中白鶴
非鶉鷄之網所能羅也魏王辟祭酒累遷五官中郎長
史

鍾士季目王安豐阿戎了了解人意

王隱晉書曰戎少清明曉悟

謂

裴公之談經日不竭

裴願已見

吏部郎闕文帝問其人於鍾

會會曰裴楷清通王戎簡要皆其選也於是用裴

按諸書皆

云鍾會薦裴楷王戎於晉文王文王辟以為掾不聞為吏部郎

王濬沖裴叔則二人總角詣鍾士季須臾去後客問鍾

曰向二童何如鍾曰裴楷清通王戎簡要後二十年此

二賢當為吏部尚書冀爾時天下無滯才

晉陽秋曰戎為兒童鍾會

異之

諺曰後來領袖有裴秀

虞預晉書曰秀字季彥河東聞喜人父潛魏太常秀有風操八

歲能著文叔父徽有聲名秀年十餘歲有賓客詣徽出則過秀時人為之語曰後進領袖有裴秀大將軍辟為掾父終推財與兄年二十五遷黃門侍郎晉受禪封鉅鹿公後累遷左光祿司空四十八薨謚元公配食宗廟

裴令公目夏侯泰初肅肅如入廊廟中不脩敬而人自

敬

禮記曰周豐謂魯哀公曰宗廟社稷之中未施敬而民自敬

一曰如入宗廟琅琅

但見禮樂器見鍾士季如觀武庫但覩矛戟見傅蘭碩

江廡靡所不有見山巨源如登山臨下幽然深遠

玄會
嘏濤

並已
見上

羊公還洛郭奕為野王令

晉諸公贊曰奕字大業太原陽曲人累世舊族奕有才望

歷雍州刺史尚書

羊至界遣人要之郭便自往既見歎曰羊叔

子何必減郭大業復往羊許小悉還又歎曰羊叔子去人遠矣羊既去郭送之彌日一舉數百里遂以出境免官復歎曰羊叔子何必減顏子

王戎目山巨源如璞玉渾金人皆欽其寶莫知名其器

顧愷之畫贊曰濤無所標明淳深淵默人莫見其際而其器亦入道故見者莫能稱謂而服其偉量

羊長和父繇與太傅祜同堂相善仕至車騎掾蚤卒長

和兄弟五人幼孤

羊氏譜曰繇字堪甫太山人祖續漢太尉不拜父祕京兆太守繇歷車騎

掾娶樂國禎女生五子秉洽式亮悅也

祜來哭見長和哀容舉止宛若成

人迺歎曰從兄不亡矣

山公舉阮咸為吏部郎目曰清真寡欲萬物不能移也

名士傳曰咸字仲容陳留人籍兄子也任達不拘當世皆怪其所為及與之處少嗜欲哀樂至到過絕於人然後皆忘其向議為散騎侍郎山濤舉為吏部武帝不用太原郭奕見之心醉不覺歎服解音好酒以卒山濤啓

事曰吏部郎史曜山處缺當選濤薦咸曰真素寡欲深識清濁萬物不能移也若在官人之職必妙絕於時詔用陸亮晉陽秋曰咸行已多違禮度濤舉以為吏部郎世祖不許竹林七賢論曰山濤之舉阮咸固知上不能用蓋惜曠世之雋莫識其意故耳夫以咸之所犯方外之意稱其清真寡欲則迹外之意自見耳

王戎目阮文業清倫有鑒識漢元以來未有此人

杜篤新書

曰阮武字文業陳留尉氏人父謨侍中武閭達博通淵雅之士陳留志曰武魏末河清太守族子籍年總角未知名武見而偉之以為勝已知人多此類著書十八篇謂之阮子終于家郭泰友人宋子俊稱泰自漢元以來未有林宗之匹

武元夏目裴王曰戎尚約楷清通

虞預晉書曰武陵字元夏沛國竹邑人父

周魏光祿大夫陟及二弟歆茂皆總角見稱並有器望鄉人諸父未能覺其多少時同郡劉公榮名知人嘗造周周見其三子公榮曰君三子皆國士元夏器量最優有輔佐之風力仕宦可為亞公叔夏季夏不減常伯納言也陟至左僕射

庾子嵩目和嶠森森如千丈松雖磊砢有節目施之大

厦有棟梁之用

晉諸公贊曰嶠常慕其舅夏侯玄為人故於朝士中峨然不羣時類憚其風節

王戎云太尉神姿高徹如瑤林瓊樹自然是風塵外物

名士傳曰夷甫天形奇特明秀若神八王故事曰石勒見夷甫謂長史孔羨曰吾行天下多矣未嘗見如此人當可活不羨曰彼晉三公不為我用勒曰雖然要不可加以鋒刃也夜使推牆殺之

王汝南既除所生服遂停墓所兄子濟每來拜墓略不
過叔叔亦不候濟脫時過止寒溫而已後聊試問近事
答對甚有音辭出濟意外濟極惋愕仍與語轉造精微
濟先略無子姪之敬既聞其言不覺慄然心形俱肅遂
留共語彌日累夜濟雖雋爽自視缺然乃喟然歎曰家
有名士三十年而不知濟去叔送至門濟從騎有一馬
絕難乘少能騎者濟聊問叔好騎乘不曰亦好爾濟又
使騎難乘馬叔姿形既妙回策如縈名騎無以過之濟

益歎其難測非復一事

鄧粲晉紀曰王湛字處沖太原人隱德人莫之知雖兄弟宗族

亦以為癡唯父袒異焉袒喪居墓次兄子濟往省湛見牀頭有周易謂湛曰叔父用此何為頗曾看不湛笑曰體中佳時脫復看耳今日當與汝言因共談易剖析入微妙言奇趣濟所未聞歎不能測濟性好馬而所乘馬駿駛意湛愛之湛曰此雖小駛然力薄不堪苦近見督郵馬當勝此但養不至耳濟取督郵馬穀食十數日與湛試之湛未嘗乘馬卒然便馳騁步驟不異於濟而馬不相勝湛曰今直行車路何以別馬勝不唯當就蟻封耳於是就蟻封盤馬果既還渾問濟何以暫行累日濟倒踣其偶識天才乃爾

曰始得一叔渾問其故濟具歎述如此渾曰何如我濟曰濟以上人武帝每見濟輒以湛調之曰卿家癡叔死

未濟常無以答既而得叔後武帝又問如前濟曰臣叔

不癡稱其實美帝曰誰比濟曰山濤以下魏舒以上晉陽

秋曰濟有人倫鑒識其雅俗是非少所優潤見湛歎服其德宇時人謂湛上方山濤不足下比魏舒有餘湛聞之曰欲以我處季孟之間乎王隱晉書曰魏舒字陽元任城人幼孤為外氏甯家所養甯氏起宅相者曰當出貴甥外祖母意以魏氏甥小而惠謂應相也舒曰當為外祖成此宅相少名遲鈍叔父衡使守水碓每言舒堪八百戶長我願畢矣舒不以介意身長八尺二寸不修常人近事少工射著韋衣入山澤每獵大獲為後將軍鍾毓長史毓與參佐射戲舒常為坐畫籌後值朋人少以舒充數於是發無不中舒容範閑雅殆盡其妙毓歎謝之曰吾之不足盡卿如此射矣轉相國叅軍晉王每朝罷目送之曰魏舒堂堂人之領袖累遷侍中司徒

於是顯名年二十八始宦

裴僕射時人謂為言談之林藪

惠帝起居注曰顧理甚淵博贍於論難

張華見褚陶語陸平原曰君兄弟龍躍雲津顧彥先鳳

鳴朝陽謂東南之寶已盡不意復見褚生陸曰公未覩

不鳴不躍者耳

褚氏家傳曰陶字季雅吳郡錢塘人褚先生後也陶聰惠絕倫年十三作鷗鳥

水碓二賦宛陵嚴仲弼見而奇之曰褚先生復出矣弱
不好弄清淡閒默以墳典自娛語所親曰聖賢備在黃
卷中舍此何求州郡辟不就吳歸命世祖補臺郎建忠
校尉司空張華與陶書曰二陸龍躍於江漢彥先鳳鳴
於朝陽自此以來常恐南金已盡而復得之於吾
子故知延州之德不孤淵岱之寶不匱仕至中尉

有問秀才吳舊姓何如答曰吳府君聖王之老成明時
之儁又朱永長理物之至德清選之高望嚴仲弼九臯
之鳴鶴空谷之白駒顧彥先八音之琴瑟五色之龍章
張威伯歲寒之茂松幽夜之逸光陸士衡士龍鴻鵠之
裴徊懸鼓之待槌

秀才蔡洪也集載洪與刺史周俊書曰一日侍坐言及吳士詢于蜀蕘遂

見下問造次承顏載辭不舉敕令條列名狀退輒思之今稱疏所知吳展字士季下邳人忠足矯非清足厲俗信可結神才堪幹世仕吳為廣州刺史吳郡太守吳平還下邳閉門自守不交賓客誠聖王之老成明時之儁又也朱誕字永長吳郡人體履清和黃中通理吳朝舉賢良累遷議郎今歸在家誠理物之至德清選之高望

也嚴隱字仲弼吳郡人稟氣清純思度淵偉吳朝舉賢
良宛陵令吳平去職九臯之鳴鶴空谷之白駒也張暘
字威伯吳郡人稟性堅明志行清朗居磨涅之中無淄
磷之損歲寒之松柏幽夜之逸光也陸雲別傳曰雲字
士龍吳大司馬抗之第五子機同母之弟也儒雅有俊
才容貌瓌偉口敏能談博聞彊記善著述六歲便能賦
詩時人以為項託楊烏之儔也年十八刺史周俊命為
主簿俊常歎曰陸士龍當今之顏淵也累遷太子舍人
清河內史為凡此諸君以洪筆為鉏耒以紙札為良田
成都王所害

以玄默為稼穡以義理為豐年以談論為英華以忠恕
為珍寶著文章為錦繡蘊五經為繒帛坐謙虛為席薦

張義讓為帷幙行仁義為室宇修道德為廣宅

按蔡所論士十

六人無陸機兄弟又無
凡此諸君以下疑益之

人問王夷甫山巨源義理何如是誰輩王曰此人初不
肯以談自居然不讀老莊時聞其詠往往與其旨合愜

之畫贊曰濟有而
不恃皆此類也

洛中雅雅有三嘏劉粹字純嘏宏字終嘏漢字冲嘏是

親兄弟王安豐甥並是王安豐女壻宏真長祖也晉諸公贊

曰粹沛國人歷侍中南中郎將宏歷祕書監光祿大夫
晉後略曰漢少以清識為名與王夷甫友善並好以人
倫為意故世人許以才智之名自相國右長史出為襄
州刺史以貴簡稱按劉氏譜劉邠妻武周女生粹宏漢

非王洛中錚錚馮惠卿名孫是播子

晉後略曰播字友聲長樂人位至大

宗正生孫八王故事曰孫少以才悟識當世之宜蚤歷清職仕至侍中為長沙王所害

孫與邢喬

俱司徒李膺外孫及膺子順並知名時稱馮才清李才

明純粹邢

晉諸公贊曰喬字曾伯河間人有才學仕至司隸校尉順字曼長仕至太僕卿

衛伯玉為尚書令見樂廣與中朝名士談議奇之曰自

昔諸人沒已來常恐微言將絕今乃復聞斯言於君矣

命子弟造之曰此人人之水鏡也見之若披雲霧覩青

天

晉陽秋曰尚書令衛瓘見廣曰昔何平叔諸人沒常謂清言盡矣今復聞之于君王隱晉書曰衛瓘有名

理及與何晏鄧颺等數共談講見廣奇之
曰每見此人則瑩然猶廓雲霧而覩青天

王太尉曰見裴令公精明朗然籠蓋人上非凡識也若

死而可作當與之同歸或云王戎語

禮記曰趙文子與叔譽觀于九原文

子曰死者如可作也吾誰與歸鄭玄曰作起也

王夷甫自歎我與樂令談未嘗不覺我言為煩

晉陽秋曰樂廣

善以約言厭人心其所不知默如也太尉王夷甫光祿
大夫裴叔則能清言常曰與樂君言覺其簡至吾等皆
煩

郭子玄有雋才能言老莊庾敳嘗稱之每曰郭子玄何

必減庾子嵩

名士傳曰郭象字子玄自黃門郎為太傅主簿任事用勢傾動一府敦謂象曰卿自

是當世大才我疇昔之意都已盡矣其伏理推心皆此類也

王平子目太尉阿兄形似道而神鋒太雋太尉答曰誠

不如卿落落穆穆

王隱晉書曰澄通朗好人倫情無所繫

太傅府有三才劉慶孫長才


晉陽秋曰太傅將召劉與或曰與猶膩也近將汙人

太傅疑而禦之與乃密視天下兵簿諸屯戍及倉庫處所人穀多少牛馬器械水陸地形皆默識之是時軍國多事每會議事自潘滔以下皆不知所對與便屈指籌計所發兵仗處所糧廩運轉事無凝滯於是太傅遂委之

仗潘陽仲大才裴景聲清才

八王故事曰劉興才長綜覈潘滔以博學為名裴邈

疆立方正皆為東海王所暱俱顯一府
故時人稱曰與長才滔大才邈清才也



世說新語卷中之上